

蒙園紀聞

寶昌雜錄

二種

董玉書輯

蒙園紀聞
寶昌雜錄

京	印	三	壬
師	於	月	戌

甲午八月二十日劉十枚携
贈蒼史七劉遵友也

自序

距余廡廬南不百武有屋三楹舊爲旗軍校射之所古木蒼秀細草如茵繚以周垣短不遮山可以眺遠假之旗主葺而新之額曰蒙園暇與二三同志開尊論古促膝吟詩避塵囂破岑寂意甚樂也余宦游張垣先後近十載塞上見聞所及筆之于書遂成蒙園紀聞云辛酉嘉平月臘日江都董玉書拙脩氏識于古寶昌州官廡



蒙園紀聞

江都董玉書拙脩甫輯

張家口上堡名來遠堡城高三丈二尺方二里十三步門樓二角樓四堡東水關一座明萬曆年巡撫江道亨築磚包堡內建撫賞廳觀市廳爲互市之所清開門二東曰小境門西曰大境門爲蒙古外藩入京孔道今則雉堞依然東隅水關已冲刷淨盡矣

講市臺在來遠堡內俯臨邊牆明萬曆中開馬市于此志書載有清王鷺馬市圖序其略云方王囊毅之初建市議曰朝廷若允俺且封貢諸邊有數年之安可乘時修備設敵背盟吾以數年蓄養之財從事戰守愈于終歲奔命自救不暇者是襄毅亦知敵之不可狃而姑爲權宜以紓近憂而就遠計異時枋國之臣苟以燕閒之時申固不拔之計簡軍實飭戎器厲武守常以敵之不至使我有以待其至則封疆之事無弊可也乃觀有明之政一切不然云云魏絳和戎誠爲失計迄今

遺址猶存每逢夏令爲蒙漢交易之所撫今追昔能勿慨然

堡之東山有蒙海朝宗四字摩崖刻石其上又有華彝界限四字皆明人手筆又膳房堡北山頂有罡風二字壁窠書徑五尺餘不知何時所作虞臺嶺有譚懋碑記其餘碑碣蕩然無存

恒代以北上谷爲雄胡市旣立往往民饒于財迹其置市之所大率在縣境百餘

里閒漢鮮卑烏桓市在寧城遼市在羊城金火唵權塲在羊城春市場在集寧今興

和縣明馬市在張家口清西北諸藩往來市易者皆由來遠埠

東洋河源出塞外由山西天鎮縣入口東至柴溝堡合西洋河東流經懷安縣界

又東至暗莊子合南洋河入萬全縣界又東合清水河南逕府城東匯入桑乾邑

中諸水此爲最巨卽古于延水也水經注曰于延水出塞外柔遠鎮亦名修水東南流逕大寧縣故城南地理志曰廣寧也

清水河源出塞外鴛鴦湖南匯正北溝東西沙溝諸水流入張家口驟雨水疾邊

墻橋壩屢被冲嚙卽古寧川水也水經注曰水出西北東南流逕川寧縣故城南地理志曰寧縣也于延水東左與寧川水合是

也

普渡橋即今通橋張家口堡東南清水河上明萬曆二十八年鎮守都督梁秀義民劉宇等捐建長二十五丈廣二丈二尺高一丈八尺洞門七爲邊塞津梁足資利濟至順治中知縣李三光重脩增長二十五丈共五十丈旁翼石欄明守讓有通橋記

新保安有表忠祠祀明謫戍錦衣衛經歷贈光祿寺少卿諡忠愍沈公鍊也祠有

直隸總督方恪敏公

諱觀承安
徽桐城人

青霞沈公祀田碑記其文曰明贈光祿寺少卿忠

愍沈公祠在宣郡東路之保安公謫所也公劾權相嵩父子翼虎誤國請僇之廷榜數十謫佃關外公倉卒寄妻孥于廣柳軍里老聞公至爭餽薪粢徙家以家公公旣謫矣持道晦之說優游塞上可不及于禍公勁氣特達不少挫衄刺嵩詈嵩縛草肖奸以攢射嵩而卒以殺身若公者真可謂歲寒之一人矣當嵩燄時抗疏劾嵩死最烈者畿南椒山楊公畿北則公死于編管碧血丹心均與日月爭光者

獨椒山死妻子尙得免公則覆巢無完卵關外之民今猶傷之椒山祠之在保定者余總藩時已治之並立祀田贍其嗣人丙子冬閱邊至保安謁公祠求其後宣化黃令可潤懷來吳令文正以公後人式微祀田弗守爲言余曰此守土之責也二令諮其裔孫振家墳田數頃鬻于孟氏謀贖之孟生嚮義以三頃歸祠弗受直二令請書以垂後余謂公之貞風浩氣時照耀于關雲嶺雪之間不以沙塞荒漠而就湮也而歸田供祀與昔之徙家餽粢者如一轍嗚呼此百世之公心哉振家出公長子襄之後襄構難時遺孤在抱獲免者未始非天意也因并書之

沈忠愍謫戍保安衛人賈石徙宅居之難方作石力勸沈二子袞袞避去徐夫人不允及沈卒于獄石得屍潛埋之復勸二子急逃弗從石乃託故去之河南旣而袞袞同被害徐夫人携幼子袞徙居雲州是時與沈素識往來者皆株連無遺獨石以先去免密遣人收葬袞袞並經理家屬之在雲州者嵩敗乃返故居後沈長子襄至灤陽石爲指示沈及二子藁葬處因得扶柩歸里

秦王次仲上谷郡人也性能窺測造化變通無窮隱居庸山中不爲祿仕因蒼頡所制書學者每苦其難次仲更爲隸法簡便徑直急速可成是時秦方燔書廢古訓官獄多事始皇得次仲書大喜遣使三召辭不至始皇怒令下杜程邈增損之名曰隸書後世謂隸書程邈所造實本于次仲云

王惲中堂事記云居庸關世傳始皇北築居庸徙于此故名居庸關過街塔城歐陽元功奉勅撰碑賜白金五十兩

泰定三年五月遣指揮使元都蠻鏤西番呪語于居庸崖石

王守仁年十五訪客居庸山海關時闌出塞上與諸屬國人角射因縱觀山川形勝宏治十三年成進士朝議方急西北邊守仁條八事上之

于清端公巡撫北直時康熙四十年間懷來地近北邊民食官鹽不便鹽商又抑勒之幾釀巨案于公奏請聽民永食彞鹽即今之蒙鹽按丁包課官民兩便邑民食德

不忘建于公祠以崇報饗至今猶存云

賜兒山縣東南二十五里張家口西山有雲泉寺又稱雲泉山有泉二泓一上注曰噴玉一側注曰汎珠味特甘冽游人出關選勝大都于此登高舒嘯酌泉滌塵以寄雅興昔王觀察定安安侍御維峻先後謫戍來此咸有題詠庚戌予初出塞登山嘗一見之改元以後重游山寺安侍御摩崖石刻尙存其詩云爲覽雲泉勝山中我亦幾石湫傳怪久洞佛賜兒多老樹森陰壑屏峯束大河得閒三載戍長劔倚天磨志書載有邑人楊西崖雲泉山記先生名國聲字廣譽西崖其別號也康熙朝由明經除湯溪縣知事升夔陵州知州內遷京府治中湖廣司郎中歷官中外所至有聲乾隆元年引病歸里事見志書本傳

雲泉山上有聳然亭天津楨威將軍王廷楨題云相傳明有王將軍者于雲泉寺峯頂建一亭額之曰聳然珍府道尹能言之廷楨來統邊隅昉四月矣綏定民生蒐討軍實兢兢夙夜輒復悚然悚亦聳也昨偶來此小憇補書此額藉以自警抑若四百年前之吾宗有以詔我也按此跋係無錫孫寒崖手筆

錫山侯病驥游恆山歸道過張垣有題雲泉山水洞冰洞詩云儘使河山舉目哀
秋風萬里鬢霜催試嘗兩洞炎涼味幾許羣生覺悟來病驥與寒崖中表故並及
之

懷來縣舊志六郎城在傍水峪

今名棒槌峪

相傳宋楊延釗築按延釗知保安州邊人

呼爲六郎今址猶存

懷來縣西門廣慈寺一名皇寺爲康熙皇帝駐蹕之所御書金字心經對聯詩軸
以賜之並留棕蒲御履各一雙寺僧寶藏之

康熙三十五年帝駕出張家口經懷來至沙城見燒缸流珠取嘗曰酒甚佳命侍
衛馳進太后從此京都人盛稱沙酒即今之沙城黃酒也

慶壽寺舊名竹林宏福寺在懷來縣成化時改今名寺有石柱上刻佛經多梵字
據舊碑云寺建于晉太康年

皇亭在大境門外迤西有碑二均書皇恩浩蕩四字一爲直隸總督周元理立一

爲直隸總督胡季堂立考此亭之緣起據父老相傳僉云康熙皇帝昔由庫倫回蹕距口不遠乃止扈從獨行至大境門則更漏三下門已嚴扃適滿洲鑲黃旗人關某綽號兩把子司閤呼之不應并云雖皇帝駕到未奉明命亦不能開帝遂暫駐蹕門外盤坐石上達旦始入查取關某職名傳旨嘉獎或云賞給副都統銜又云以東西太平山地賞之其說不一邑人以翠華戾止遂建亭勒石以誌寵幸至今門禁猶嚴司筦鑰者咸津津樂道云

張家口洗馬林即葦麻嶺萬全縣西七十里元置河兒軍于此地爲要衝且與大同天城接境西垣旣成東作不舉敵將避固攻瑕則得之大同者失之宣府今軌道交通形勢一變然邊氛不靖關山險要防守仍不可忽也

尼雅滿攻居庸關慮居庸難取遂分兵由紫荆口金坡攻易州出奇取鳳山沿皇太妃嶺以侵昌平縣旣至昌平則反顧居庸矣于是居庸亦潰金人遂入

金人起遼東顧拔大同由居庸入遼人起遼左亦由宣大入居庸元人起和林于

開平甚邇亦不由古北諸路乃南取宣大由紫荆入而南攻居庸破之

西沙河縣西七十里洗馬林堡西百餘步源出塞外每當汛漲奔突慄疾搏嚙城根頽圯七十餘丈乾隆年間建護城石隄以資捍禦迄今夏雨暴至河水奔流直射張家口玉帶橋下邊路街一帶頃刻即成澤國車馬往來視爲畏途水利一道不可不講也

野狐嶺萬全縣西北三十里膳房堡北路通舊興和城歷遼金元明皆稱要地

永樂二十二年四月帝北征駕次土木朝鮮遣使詣軍門貢方物正統十四年秋七月瓦剌入寇己丑帝下詔親征八月至宣化瓦剌也先兵大至所戰不利至鷓兒嶺全軍盡覆辛酉六師次土木掘井不得水移營敵兵乘之師大潰死者數十萬也先擁帝北去按土木堡城在懷來縣城西三十里通志本名統幕鎮唐初開道據懷戎時所置後訛爲土木明永樂初置堡正統末車駕駐此北狩堡遂毀嘉靖四十五年修築

景泰元年夏六月戊戌瓦剌知院參政完口者脫懽五人齎番文表至請命和禮部侍郎李實爲正使羅綺少卿爲副使使瓦剌七月初七日出獨石口過氈帽山初八日宿興和衛東河邊初九日宿昂昂岡兒卽海子初十日宿失刺失薄禿卽也先邊塞十一日至也先營十二日朝見皇上曰比我出來非爲游獵私己之事乃爲天下生靈躬率六軍征討迤北不意被留在此實因王振陳友馬清馬雲所陷也先欲送回又被喜寧阻住今你每回去覆當今皇帝並內外文武羣臣差來迎我願看守祖宗陵寢或做百也好若不來接收也先人馬擾邊不休我身不惜祖宗社稷天下生靈爲重十三日也先備酒相待謂實等曰太上皇帝留在這裡是一個閒人還你每千載之後只圖一個好名兒你回去奏知務奏大人來接我便差人送去如今送去便易了你每皇帝了十四日拜辭上皇起行宿荒野十五日宿失刺失薄禿十六日過蕁麻嶺十七日從西陽河入關見奉使錄

韃靼之俗每以草青爲一歲人有問其歲則曰幾草矣亦有問彼日月笑而答曰

初不知之亦不能記其春與秋也每見月圓爲一月見草青遲遲方知是年有閏月也見蒙韃備錄

遼制居有宮衛謂之幹魯朵出有行營謂之捺鉢分鎮邊圉謂之部族見遼史營衛志序

己未三月上巳日梅蘭芳爲其祖母八旬演戲慶祝萊綵承歡極一時之盛日下名公巨卿投贈詩文琳瑯滿室樊山先生撰壽序一篇叙乃祖梅巧玲故事甚詳特錄之同治初有選人與慧仙善券貸二千金未到官而殉于京邸舉殯之日親朋雲集而慧仙亦至衆疑其索逋來也慧仙敬拜訖出券就燭焚之揮涕出門而去歸語媪曰曩貸金時假汝條脫以足之今併汝金亦罄矣媪曰君能行義吾獨不能捨此淺淺者耶茲事五十年前都下盛傳今知者鮮矣

伶倫尙義任俠可風士大夫聞之能無愧色近聞張垣侯峻山一事頗與此相類峻山萬全縣人素工秦腔名十三旦光緒年間供奉內廷曾邀宸賞由是負盛名

坐擁厚資朱顏黑髮猶如少年每遇災振善舉猶復登場演八大槌黃鶴樓各劇以爲之助曩有田生侯之塾師也貧困無聊詣京師峻山遇諸塗執弟子禮甚恭慷慨傾囊納貲爲官復浼當道介紹竟以一官赴省宦成而歸晚近之世師友之道衰矣峻山一伶人耳待先生若此其敬猶有古君子之風焉鄉人咸稱侯老板

云庚子之變立山伏法門客星散峻山往收其屍經紀喪事亦義舉也附識之

賜兒山熏肉清例每年冬十月入貢辛亥以後此例遂廢侯峻山得其遺法以松木屑在山熏炙設鋪出售鋪號峻嶺齋由是士民得嘗禁齋頗稱佳味

宣化于家花園清大學士松筠題介春園額西人願以五百金購之園主未允

張北縣今遷治興和城往往有古物發現去歲建築衙署工人掘有舊甕一具相傳是元代物高大令佑祝以小磁盤一贈周曉垣曾于案頭見之余在市上得銅鏡銅鐸各一是古軍樂器考證圖籍適相符合據市人云在興和城購來蓋塞外爲自古用兵之地宜有此種軍器出土殊可寶貴

獨石口在赤城縣有獨石亭爲塞外名勝之一石上有突兀孤秀一片飛來摩崖大字惜無署歎時代難考

又有萬歷四年宣大閱邊巡按御史吳亮題九日登獨石亭詩四首其一云獨石一拳立孤亭四面開當關眞卓爾接地亦雄哉北野黃花晚西風歸雁哀偶來聊遣興不作望鄉臺其二云爾號丈夫石誰稱石丈夫亂山中砥柱絕塞表宏圖狐兔寧容窟豺狼敢在塗還將壁立意鳴劔定伊吾其三云戲馬留陳迹停驄得勝游參軍應落帽諸將盡兜鍪雁塞邊塵淨龍沙宿雨收故園松菊在回首仲宣樓其四云萬事干戈裏三秋歲月新難逢開笑口未許乞閒身范叔登車轡陶公漉酒巾平生獨立願對石媿嶙峋

黃莘田先生藏有吳門顧二孃所造硯田一方背刻莘田先生小像自題匪仙匪儒其形則癯宜邱壑居帶經而鋏末有一硯耕歸印面刻畊兮鑿兮留方寸兮硯側刻吳門顧二孃造六字今藏呂子涵都戎家友人手拓一本贈予爲題七絕四

首黃童江夏號無雙俠骨仙才兩未降曾爲元章耽石癖未妨彭澤理歸艤先生

會以耽研効歸紫玉彫鎊石一方墨池猶有麝蘭香摩挲小印留鴻爪艷說吳門顧二娘幸四

一研歸耕望若仙閩中老輩感雲烟東坡笠屐傳遺像流落江南二百年先生往來江淮

十餘年故此研遺存江南美人名士不重逢感慨黃梁一夢中趙璧完全須拂拭莫將清白誤

弘農此研爲某君携去以奉當道因此招尤今仍完璧歸趙矣

明武宗微行至宣府得李鳳携之歸至居庸鳳歿葬之關西草生其冢皆白俗謂之白墓

金左丞完顏綱與元將戰于縉山敗績失其印萬歷二十八年土人築墻得于土中貯之縣庫

昔穆圖善任都統爲駐防子弟建立掄才書院是爲察哈爾教育人才之始後承勳繼設兩等小學今張垣有第一中學師範學校附設國民學校各縣分設高等國民兩學校旗羣亦建有國民學校文化漸開已非當日閉塞可比

武恪字伯威宣化人初以神童游學江南爲江西儒學提舉吳澄薦入國學明宗在潛邸選爲說書秀才及出鎮雲南恪隨行在明宗欲起兵恪諫之左右惡恪言還京師居陋巷教訓子弟文宗知其名除秘書監典簿秩滿丁艱屢薦不起陽爲瘖瘡若不能應命者好讀周易所著有水雲集若干卷

下堡東關內有城隍廟二一屬萬全一屬張北俗以張北草地遂稱草城隍廟今察區地方審判廳將設于內後殿有端忠愍公午橋碑記蓋監督張家口關務時撰也

上東營南隅鑲藍旗辦公署有屋三楹地方幽曠可以觀山假之旗主爲夏日游息之所顏曰寄雲別墅己未夏重葺草亭荷沼布置一新花木之盛倍于往歲易其名曰蒙園田韞山都護書額一方安邱周健龍觀簪聯云四面雲山三面柳一園花草半園蔬龍川唐休子聯云因樹爲屋開門見山北平趙湘丞聯云山靜日長安得四時皆似夏花明柳暗居然半畝也成園薛性男篆書聯云水聲常

在耳山色不離門石屏胡珍府觀察隸書橫額草亭二字足爲園林生色予有一
聯云晝了公事夜接詞人莫辜負邊亭風月酒被清愁花銷英氣須惜取過客光
陰池中白蓮一朵經秋始開亭亭玉立不染塵泥堪爲蒙園留一紀念庚申春予
出宰興和園漸荒蕪今已易爲校舍矣桐城方子易繪有蒙園銷夏圖淮陰陳月
泉爲之記

豐鎮黃大令箸忱捐建育嬰堂曾撰一聯云烏覆后稷虎孔子文物類具有仁心
何況斯民稱父母私育衛青孤遺趙武將相本來無種且乘時勢造英雄

張家口俗例七月十五日爲中元節在通橋上以紙糊鍾馗及目蓮諸像晚于橋
北河灘上放花爆燒鍾馗游人觀如堵牆俗說燒鍾馗後天氣卽涼蓋指節候而
言也

都署前有蒙古營上東營係三翼八旂官兵駐防之所每屆新春上元鐙節游人
如織不減京師工部鐙景辛亥寓此躬逢其盛想見邊塞風清景象今則火樹銀

花香然泡幻矣

市圈內六月六日爲六六節開臺演劇車馬如雲各商家放假一日設筵款客賓主盡歡三日而罷

七月十六日永豐堡

距縣三十七里

會期士女雜沓席地而坐圍鑪食瓜醉酒爲樂頗饒

野趣庚戌余游龍泉山詩有炎涼冰炭隨時異即詠此也堡有龍泉寺泉水清潔地亦幽僻惜爲皮坊所據

浴佛日天氣清和午飯訖適友人約出遊遂携祥兒信步過河東沙明水淨千仞微斜古樹橫柯蜷曲上聳饒有畫意山坡下有王君鳳洲墓與弇州同字亦奇事也墓旁流水一灣渡石橋登八角亭見上下堡風景宛然在目

霏雪錄云北方黃鼠各有配匹人掘其穴見有小土窰若牀榻之狀乃牝牡所居也秋時蓄草木實及菽黍禦冬各爲小窰別而貯之天晴和出坐穴口見人則拱前腋如揖狀乃竄入穴狀故又謂禮鼠惟畏地猴地猴形極小人馴養入其穴喙

曳而出味極肥美元朝以爲玉食之獻置官守之萬全邑中諸鄉多有之國朝亦嘗進御後卽停罷入饌宜和粉蒸食朱竹垞詞所謂油蒸糝附寸膏凝結者也地猴今人皆呼夜猴

麀卽今之四不像也似鹿非鹿似麀非麀其角可爲決角根如掌中如腐朽黯黑以之爲決周圍黑道勻透者爲貴然百不得一近見市中以角爲鼻烟碟邊帶黯黑色亦可寶貴

黑龍江外紀云堪達漢鹿類背上項下彷彿駱駝沈存中筆談北方有駝鹿卽此又云四不像亦鹿類俄倫春役之如牛馬有事則哨之舐以鹽則去部人賴之按堪達漢與四不像當是二物

沙雞小如鴿鼠脚無後趾歧尾愁急羣飛一名寇雞卽史所謂突厥雀也又名鷄鳩俗云石雞非是秋冬之間土人捕之售于市取以入饌野似雉而鮮美過之

押不盧藥草名食其汁立死以他藥解之立蘇元白珽續演雅草食押不盧雖死

元不死未見滌腸人先聞棄簣子

來遠堡東山微凹處有石似魚形色白乘高瞰之宛然沙也夏秋間旱此石忽放光如銀則大雨立降至今雨後猶或見之

大境門外八里許道北有一山俗名南天門頂有石門其形圓天晴則中分爲兩半圓形陰雨則合周健龍有詩云一角石門雲際啟土人嘉號錫南天

古人詠居庸詩甚多雄偉者如邊貢之雄吞巨海山形斷秀壓平原地脈分馮琦之平臨星斗三千丈下瞰燕雲十六州釋梵琦之力排劍戟三千士門掩山河百二重元明善之峯勢陡回愁障日地形高出欲捫天皆錚錚有聲者又有某詩云雲橫峻嶺千排出天劈雄關一綫開句亦雄壯可誦

延慶有劉若愚明天啟朝宦官文辭博瞻所著有宮闈秘典一書皆神熹間宮闈事其論撰有良史風若愚司禮監陳矩名下魏忠賢初用事若愚屏居私室李永貞取入內直房主筆札永貞多密謀若愚心識之而已不敢與外廷通忠賢敗若

愚被劾充孝陵淨軍旣而御史劉重慶劾李實誣高攀龍等七人事其疏乃空印白紙忠賢令李永貞填書莊烈帝驗疏果以墨壓硃遂誅永貞并坐若愚大辟久之得免若愚當忠賢時祿賜未嘗一及旣被罪痛己之冤抑而恨王體乾涂文輔石元雅輩之漏網也作酌中志以自明凡四卷二十三條按酌中志收入四庫全書宮闈秘典不傳于世

明時募卒戍邊各路僉發故萬全右衛張家口沿塞多并晉人

八家商人皆山右籍明末時以貿易來張家口王登靳良玉范永斗王大宇梁嘉賓田生蘭翟堂黃雲發自清入關遣人來口市易皆此八家主之定鼎後奉召入都燕便殿賜上方服饌自是每年辦進皮張交內務部廣儲司其後嗣多不振惟范氏因北運一役范岡卿蒙恩賚弟子顯貴蔚爲望族

范君諱毓釐字芝巖世居介休明初徙張原村至祖肖山公家大起市易邊城以信義著國初召至京授以職力辭賜產張家口歲輸皮幣父德淵繼之後感疾歸



665199

君代其事曉暢邊情蒙古諸部長往往知君名康熙間征準噶爾官軍餽餼費不貲且苦不繼君熟籌之遂以家財運餉萬石贍察漢叟兒軍費一如所計刻期至雍正討策凌師出西北兩路籌餉亟怡賢親王以君名薦立報可君感知遇力自任擘畫悉中機宜部如所請幕府所在儲胥充裕前後十年所省部帑六百餘萬辛亥壬子間寇犯北方所失無算憲皇帝命據實報銷君以軍興急復補運如所失費金百數十萬不以上計部至大兵撤所運米胥改輸近地部以近值核銷當追運戶遠值君謂運戶悉窮追亦無可得如所改地價以償之並代輸所應追者二百餘萬金先以歷年應領米鉛價扣抵餘立五限輸部至乾隆三年復以採辦洋銅抵分限應輸之款又以應折參價及所逋運值悉辦洋銅輸直秦楚贛蘇等省鼓鑄銅產東南洋長崎諸島風波險惡倭人居奇承辦官皆視爲畏途君立遣人赴洋採辦其始終任事不擇險易如此事見汪由敦松泉文集遂撮錄之

敖漢部落爲元太祖第四某王裔其台吉額駙彭楚克林沁者尙簡親王郡主通

文藝熟習遼金元諸代事嘗與裘文達公談三史裘爲之瞪目然以他書卷詢彭亦不能驟答也純皇帝呼之曰敖漢先生見御製詩注中彭既習漢俗不樂居本土故典宿衛數十年卒於京邸禮親王尊之曰蒙古儒士

乾隆末廓爾喀用兵時和制府琳督糧餉以久戰荒徼艱于轉運公乃命驅羊負米以濟軍食人服其智按金史承安中北邊準卜叛命丞相襄征之賊人遁路既遼遠僉患乏食完顏安國曰人得一羊可食十餘日不如驅羊以追之襄從其言遂擒賊首固先有行之者矣

江南錢辛楣先生夙習蒙古語考核金元諸史及外藩諸地名非他儒之所及成王言其在上書房時質親王嘗獲元代蒙古碑版體製異于今日因詢諸章嘉國師倩其繙繹漢文先生見之曰章嘉固爲博學然其譯漢文某字句有錯誤者吾有收藏元時嚙嚙所譯漢文可取而證之後歸厲取原文出章嘉所誤處畢見故人皆拜服

定菴先生說居庸關云自入南口或容十騎或兩騎或容一騎蒙古自北來鞭橐駝與余臂行時時橐駝衝余騎顛余亦搥蒙古帽墮于橐駝前蒙人大笑余乃私歎曰若蒙古古者建置居庸關之所以然非以若耶余江左士也使余生趙宋世目尙不得覩燕趙安得與反彘者相搗戲乎萬山間我聖朝中外一家之世豈不傲古人哉蒙古來者是歲克西克騰蘇尼特皆入京詣理藩院交馬云

至元十三年正月伯顏丞相入杭二月宋三宮赴上都三月見世祖皇帝尋命幼主爲檢校大司徒封瀛國公十二日內人安康朱夫人安定陳夫人二侍兒失其姓浴罷肅襟閉門焚香於地並雉經死衣中有清江紙書云不免辱國幸免辱身不辱父母免辱六親藝祖受命立國以仁中興南渡踰三百春躬受宋祿羞爲北臣大難旣至守于一貞焚香設誓代書諸紳忠臣義士期以自新丙子五月吉日泣血書王逢浯溪集詩注逢有感宋遺事詩云五月無花草滿原天回南極夜當門龍香一篆魂同返猶藉君王舊賜恩蓋指此也

萬全縣城外舊有霍氏杏園爲塞外名勝東湖王鼎丞觀察有聯云佳景似江南
春雨杏花人醉後亂峯環塞北秋風楊柳鴈歸初

獨石縣初僑治赤城縣獨石口自民國五年遷治小河子以沽水發源於此易名
沽源廳事舊有一聯云飽嘗苦葷知民食聽徹晨鐘省宦情光緒乙未邕州楊某
手撰也

崑山柴桑著京師偶記云內府需用裱匠吳郡送四人初到卽發出細腰胡盧一
枚令裱其裏一人沈思良久乃去帶入盃鋒其中令三人互搖之使極光潔然後
用白棉紙水浸一宿調勻灌入即傾去俟乾復灌如是數次然後進御破之則徹
裏有紙更無補綴之痕奇技也

昌平州南數十里爲唐劉諫議蕢故里昔有順德某游居庸路經此有詩云一時
公論播人寰共說登科有汗顏榜上至今誰記憶留名翻在落孫山

黃鉉字九玉宣化人同史可法督師由郎中陞兵備道時維揚失陷公大呼仗劍

死後附祀史閣部祠夫人劉氏以公盡難淮揚青年矢志育子元禧成立後元禧歿夫人拮据荼苦姑婦相依勵節五十餘載年八十卒

朱公之馮字德止號勉齋宛平進士崇禎時由河東參政來宣巡撫甲申寇過太原大同繼陷寇氛震及宣境公集紳兵于城上申說大義誓以死守在城月餘一燈達旦監視宦官與鎮帥握精兵遣偵卒密約降賊數以賊惑公會寇至鎮帥等揚言出禦脫身歸卽擁衆自防公知事不可爲出衣取紅公服曰以此殮我足矣越日賊薄城下監鎮乘間開南門賊遂入公在北門聞變欲自刎左右擁公行公曰去此一步非死所矣遂服公服登城樓拜遺疏而縊焉後邑人祠于鎮城王宗伯爲之記

宣府姚時中性端不苟教人以德行爲先巨族爭聘之甲申流寇將至輒謂當事有死無二者朱中丞一人而已余當從其後遂自縊於學宮正殿西偏凜然如生時風日慘淡懷中刺刺作聲探之有自書詩曰報國無權偷生不義竊比夷齊乾

坤正氣何用此身惟有一死妻子無知付之不計郡城士庶合祠以祀與朱中丞同馨俎豆並垂不朽又申以孝由山東鄒城縣丞致仕家居聞流寇破城投井死其子見父投井亦觸柱死旌其門曰兩忠貫日

順治元年九月初三日攝政王勅諭權署總兵官王應暉知道聞賊黨盤踞太原今起大兵殲滅流氛救民塗炭以安天下十王統領前營兵將定於本月十一日起行爾宜謹守宣府城池選撥慣戰副將等官帶領驍健士卒臚壯馬匹前赴代州等候前營大兵到時聽十王號令其宣大等處口外蒙古等兵亦奉調會合十王大兵從宣府地方經過傳與人民毋致驚恐務要明白曉諭仍選調知路鄉導官丁引蒙古兵至代州不許遲延有誤軍機續後六師征討由潼關固關等處分道並進特諭

宣人孫太史世芳字克承天資穎異書一覽成誦弱冠舉於鄉嘉靖丁未會試擬元後置弟六人選館試敬一箴詩欽擢第一改翰林升檢討晉右中允轉國子司

業分校會試所取多知名士侍穆宗講讀於潛邸撰進講義多有啓沃夙以興起
斯文爲己任後主試應天先期卒於場著有孫太史遺稿宣府鎮志行於世志中
記載頗多有宣化驛記文極古雅附錄於下文曰嘉靖戊午秋御史欒君尙約承
明辟休命監我上谷適奉使近臣舍止於郊君出勞焉迺見候館就敝無以瞻事
展物于制弗恭因語理戎憲大夫郭君邦光曰朝之彛典地有置郵實隆賓禮君
子庸以覘國君亟圖之郭君曰如教已乃諏吉揣功量期就事取賞公贏不以剝
下徵役冬隙不以病農召藝工償不以縮直委吏政暇不以妨官旬日而掇度旬
日而斷遷旬日而坊墁旬日而黜聖規制肆閱條理森密有胥眛路有尹除門有
卒詰姦有徒備器有虞人入材有甸人積薪有水人監濯有火人監燎有膳人授
粢有委人獻餼有圉人陳芻有隸人省乘候館之政靡不具舉御史觀成讓美憲
大夫憲大夫亦罔敢居歸御史首畫自謂勉協于懿恐愆賓禮于是邦之耄耄踵
太史門諭我御史公夙知我憲大夫材我憲大夫式克體我御史公志茲惟一事

可概餘政焉夫屏蕪搆華氓用輯睦師用振揚邊隅肆有寧宇上之賜侈也願太史紀焉太史芳曰我土有善政哉嗣今而監者宜眎我今御史嗣今而理戎者宜眎我今憲大夫乃畀此俾登諸金石用昭垂永祀云

宣府舊有暖鋪昔葉盛賢字暖鋪記云今宣府將臣於緣邊孔道在在有暖鋪之設暖鋪云者郵舍便益之名亦唐人邊鋪之謂義兼巡邏且有成周候館廬宿之遺意焉其爲處六十九爲屋八百二十一間爲之者肇于都督孫安繼于顏彪積十有五年乃成而盛固始終與聞其事者矣又云編第暖鋪之序初以三物四教不足復益以杜甫上韋見素詩語所謂賢字暖鋪在馬頭山下泥河密邇宣府之城東且加飭于衆天詔下須所必由之地也按宣化縣秩官志葉盛字與中崑山人明景泰八年巡撫

馬中錫字天祿河間故城人成化進士弘治九年以右副都御史巡撫宣府下車之日奏劾諸姦貪將臣一時風紀肅然又爲復祀田正牧地畫馬價增團種設官

店公私皆便之按官店之設鎮城共有五區區各有屋百十間蓋爲客商居貨之所歲取其課備官用也馬公奏行時有旨刻石乘示永久嘉靖年邊臣改爲別項公署今口外邊遠各處初設縣治招徠商民宜取其法

蔚州桃花堡原民堡土築者萬歷十二年軫贅魏象樞捧詔至桃花堡口號云兵燹剛餘土一垣殘垆鬼火亂黃昏老翁休避皇華使共爾殷勤說帝恩

黎城靳榮藩字价人官蔚州政聲卓著有古循吏風職滿遷守大名著述甚富吳詩集覽二十卷刻于乾隆四十年正太守官蔚時也王鳴盛序言其今守蔚州方築暖泉隄以捍水又一循吏乃其善著書復如是其自序云蓋嘗泛觀他書未嘗不採掇記錄以備此書之用乃至簿書退食之餘行役輿馬之上友朋謙譚之時集思廣益未嘗不以是集爲拳拳云是其書多成于官蔚時並著有綠溪語二卷綠溪初稿一卷綠溪詩四卷詠史偶稿一卷

張道渥字水屋浮山人工詩善書尤精繪事世稱三絕由霸州牧改知蔚州性豪

爽事至立決無以訟繫者久之政益簡減除徭役父老以輸賦來者召入諮詢鄉
土事或醉以酒視堂皇爲嬉游與官忘也時有張風子之目願不能事上官遇事
有不便必力爭至觸其怒未嘗少屈時貴索畫者或終歲不得一紙以其才士多
優容之然卒以此罷官

田琢燕子圖自叙云明昌丙辰余從軍塞外合魯里山野舍荒涼春末有雙燕亦
巢此屋晝出夜歸余必開戶待之忽一日飛止坐隅巧語移時不去余始悟明日
秋社此鳥當歸殆留別語也因作一詩贈之曰幾年塞外歷崎危誰謂鳥衣亦此
飛朝向蘆陂知有爲暮投茅舍重相依君憐我處頻迎語我憶君時不掩扉明日
西風悲鼓角君應先去我何歸此詩以細字寫之爲蠟丸繫之燕足上明年四月
余受代歸又八年泰和甲子任潞州觀察判官四月十二日偶坐廨舍之含翠堂
忽雙燕飛至一飛簷戶間一上硯屏余諦視之繫足蠟丸故在乃知此鳥蓋往年
贈詩者也因請同年龐君才卿畫爲圖求諸公賦詩元遺山有詩云紅牋還驚掌

上看十年音息海漫漫渠家王謝堂前慣暗認曹劉可是難古錦詩囊半陸沈吳
楓好句入江深世間妾婦爭相妒禽鳥區區却賞音才氣田侯絕世奇山邱零落
更堪悲休驚燕子詩留在化鶴歸來未可知

昔徐蘭和友人雪後行獨石口詠所見有覆到晚來天亦冷羲和鞭出日三輪蓋
近北口外獨石最冷霧晦風冽則冷氣逼人有三日並出相去僅丈許土人云
若五日並出狀如梅花則更冷冬月所常見然則唐書貞觀初突厥五日並出者
非異也已未冬天氣嚴冷積雪初霽寒氣上逼重霄見日有三光並出土人亦以
爲異讀徐詩信然

己未八月吳門張仲仁先生一塵來游張垣有紀游詩八首懸之興和道尹署東
壁庚申冬胡珍府觀察內召遂携之去辛酉夏初觀察由津門錄寄一通亦可爲
邊陲文藝之徵也詩云青龍橋畔一停車憶六年前感歲華獨上長城登百雉北

門鎖鑰紀摩崖

跋云前與莊思緘王書衡同游十三陵翌日由青龍橋見闕門有
明景泰間北門鎖鑰四字石刻下款不可辨余見西人登長城趨

過十餘堞喘息追之回視莊君瞠然在後王橋折車傾頃刻亡八人併命不如羊君一步不可行今又過此不勝今昔之感

方知萬事須科學枉說天災最可傷過康莊二里許知前數時有貨車過旱橋因雨水急下根已陷車入水中死八人惟羊

七車僅免聞各國司其事者皆畧通重賜兒山上印蹄痕馬市高臨大境門歷宋

遼金元代史長城終古瞰中原到口之翌日胡珍府道尹約游大境門小境門兩門爲前清効力軍台者出入之路中有堡曰來遠

堡明時於此設馬市與蒙人交易長城始於周赧出山泉水在山清來向雲泉寺

裏行三五同人淡如水萬山高處瞰長城賜兒山雲泉寺明洪武間建清重修山有水洞冰洞趙君湘宸周君劍龍胡君

珍府及其郎余子爲宣同蒙漢通家戊卒閒昭君無復怨紅顏犇騰塞外居延水

千里來龍天鎮山西洋河源出山西天鎮山經蒙古地入口東好客孟嘗人是虎

筵前抵掌氣雄豪故人更有胡安定同踢平沙望九皋察哈爾田蘊山都統余在北洋即相識改國後政見

相同尤爲莫逆君在諸將中行輩已尊而抑然自下勤於治事有陶侃運甓之風

胡珍府道尹亦同事北洋幕府共起居者五六年現爲興和道尹出大境門即循

河堤旁步行至其署雲中自古啟戎心三駕能教萬馬瘡有約黃花開放後前塵

重向上都尋軍務處長胡君聘三爲余言三敗盧匪於塞外匪自新建賓僚馬服

是不敢入察境胡君約游元之上都期以九月再至

君皤然一老意殷勤開天遺事歛歛說君有嬌兒定出羣

趙君湘宸在
新建陸軍
中與東海徐
公同時入

幕君年長余
十四歲幼子
才五歲君清
癯是壽者相

排日觥籌敞綺筵桃源何幸見羣賢人間自有清涼境

珍重臨歧語萬千

定庵論京北
可居狀今猶
是也自田君
以次均留余
因有事返京
賦此以謝諸
君並訂九月
重游之約

喇嘛有呪詛之術凡蒙古有所爭鬥必令其徒誦之時有驗者名曰黑經然其掌

壇番僧往往自斃蓋邪術也昔漢武帝嘗命丁夫人祀祠以詛大宛匈奴北史天

竺有婆羅僧善呪詛人魏太武嘗用之蓋即此術之濫觴

土人窟山爲穴俗謂土窰即詩之陶復陶穴具有古風窰上不是原田即是孔道

袁簡齋詩話載土窰詩云雨風不向窰中入車馬還從屋上過可以互證

紇真山亦名紇干山在大同府城東北五十里其山冬夏積雪故諺曰紇干山頭

凍殺雀何不飛去生處樂

儀徵高懋功著雲中紀程云歲在壬辰夏四月爲大同之行渡江踰淮由魯直而

達晉北登五臺過雁門山程水驛記載靡遺亦吾鄉好奇之士也

察區荒服自古用兵罕尙文事志乘闕如採風問俗可資考證者惟三廳志志成于乾隆二十三年宣化縣令黃可潤叙可潤來尹宣邑適郡志燬于火續刊之三廳毗于宣其事通制府方公發前口北道錢塘金副使所創三廳志畀增校而梓以傳焉是志板存口北道署今移置興和道署中惜遺失數簡宜覓舊本補刻便成完璧

豐鎮廳志光緒七年理事同知德溥

字時泉

纂輯歲久板片遺失興和道單道尹味

仁因公蒞豐徵文考獻拾得殘本半冊後又得郝氏藏本付之剞劂續印成書

都中得勝歌

即八角鼓戲

乃阿文成公平金川時之凱唱也曾于塞上溥都護玉岑師

座中聞之余卽席賦詩有驃騎將軍今老健羽林子弟已無多句溥師溫霽可親公暇召飲進數十巨觥神采自若凡陪讌者皆頽醉不堪矣今歲元辰駕歸道山門墻企仰爲之泫然

雞鳴山宣化城東五十里俗傳代王夫人磨笄自殺國人祠之有羣雞鳴于祠上

按一統志唐太宗北伐至山聞雞鳴因名今攷磨笄山在蔚州則此山之名應以一統志爲是蔚縣馬頭山在城東南五十里即磨笄山

尹耕磨笄山辨磨笄之辨諸家不同有謂在保安州東卽雞鳴山者有謂在飛狐縣東北百五十里者有謂在濟南府長清縣者要皆求之于典籍文字之間而不稽之于道里徒步之下是故語意近眞而指摘各異考者轉增疑惑莫可較一也夫代爲蔚地其去濟南遼絕甚矣長清之山本名馬頭無可辨也雞鳴在蔚東北百五十里其去恒山則又倍之豈所謂自上臨下可見之地耶况保安上谷屬也春秋之際在外據之元非代壤而謂夫人者望夫于此自殺于此不亦謬哉考之魏土地記曰磨笄山在代郡東南二十五里一名馬頭山夫代郡廢壤在蔚城東今其東南二十餘里所謂馬頭山者人人知之但不知其卽爲磨笄耳而顧他求之可乎又括地志曰磨笄山在飛狐嶺東北蔚州去山近舍之不言飛狐去山遠取以爲較遂使考者不循其故不玩其微求之于蔚東北之道里則以雞鳴爲是

求之以馬頭之名則以長清爲疑蓋瑣瑣于典籍文字之間而不于道里徒步之下也於戲舍目前之眞循方外之似天下豈獨一磨筭哉

交牙山在蔚州城南大金國志天會十三年冬興燕雲兩路夫四十萬人之蔚州交牙山採木此劉豫遣人持海道圖及木作戰船小樣獻于大金故有是役湯泰運金源紀事詩南人乘船如乘馬越海渡江無不可北人乘馬如乘船追風躡電爭一鞭無端北人不安北漫道行水勝行陸參天拔地蔚州山四十萬人同採木同採木木不足人人思噉劉豫肉焉得手裂海道圖木自在山人在屋

朔野山人尹耕字子莘蔚人也少穎異七歲能屬文讀書日數行下日誦千餘言不忘嘉靖辛卯年十七舉于鄉明年成進士授藁城知縣入爲禮部儀制司主事遷員外郎出爲河間知府自負經濟才而偃蹇常調不獲大展于時每懷憤懣又數以言事觸忤權貴人故所入多齟齬既罷官築九宮山房讀書其中遇地方利害輒身爲擘畫不以退廢自解著塞語十一篇兩鎮三關志言邊事甚悉又著有

九宮私記朔野集皆自成一家

朔野集來馭仲刻靳綠溪別有選本未及重刊靳序云朔野詩名最著自詩綜以前爲李滄溟選錄者見于馭仲所擬小傳中竹垞錄子莘十四首而集中反逸其一別裁所載者又與集中所載不盡合又云子莘謫戍遼西其詩文秘本必携至戍所及身後贈官反甌原本散失馭仲急欲繕刻而其流布于故里者惟應酬贈答之作又云山人以經濟自負少與漸齋相切劘環溪先生亟稱之兩鎮三關志略見一斑聞其鄉約塞語更有以切日用而維風教則竹垞沈師所選山人尙以爲緒餘而况此應酬贈答者也

竹垞明詩綜云李何詩派並行曾未幾時而學李者漸少宗何者日多學李而得其風骨者前有凌溪後有朔野而已朔野以邊才自負一蹶不振坎壈而終詩如曉角秋笳聽者悽楚

沈歸愚明詩別裁云尹子莘七言律本李空同派有秋笳曉角之聲秋興春懷諸

作得少陵諸將真意

蔚州魏敏果公象樞清操峻節爲一代名臣時陸清猷公任知縣方望吏議落職公首疏論薦又嘗歷薦素稱廉介者十人皆卓然可傳公以益都馮公疏薦起用時公慮長安居不易不欲出山所親李恒嶽勸公行且約歲助白金三百公辭不受公後居京師十餘年卒賴其力終公之身無倦此其人實奇士也公著有寒松堂集十二卷年譜一卷

戰功私錄明馬都芳所著也芳年十歲爲北寇所掠使之牧芳私以曲木爲弓剡矢射俺答獵馬唬其前芳一發斃之乃授良弓矢善馬侍左右後自間道亡歸起行伍十餘年爲大帥戰膳房堡朔州登鷹巢鷓子堂龍門萬全右衛東嶺孤山土木乾莊岔道張家堡得勝堡大沙灘大小百十戰身被數十創所戰皆捷禽部長數十人斬馘無算威名震邊陲爲一時將帥冠子棟林棟官至都督林以大同參將遇清兵死焉林子燃熠戰死尙間崖爛湖廣總兵官協討貴州叛賊爲矢所中

力戰三日而死爨以總兵官鎮甘肅賊陷蘭州抵甘州曠竭力固守賊乘雪夜坎而登士卒寒而不能戰城遂陷曠死焉颺爲沔陽州同知城陷亦死之蔚縣志載馬氏三世勤王將軍戰績著有私錄子孫忠烈並殉國難誠足千古云朔野秋興詩威名萬里馬將軍白髮丹心天下聞遼水旌旗仍壯色泰山松柏已秋墳條侯早靖軍中變竇憲曾銘塞外勳獨倚凌烟思將略暮天征鴈下寒雲又如皋徐嵩年飲馬泉弔馬將軍墓詩云將軍墓近長城窟名與祁連冢並高歲久有人耕隴土天寒無客薦溪毛弓刀絕世聞前代忠孝傳家教後曹定許英靈來飲馬聊酬汗血舊勳勞

吳江顧東巖先生我魯其名也少學詩于沈尙書德潛吳中名士結爲竹溪吟社推爲領袖與靳太守榮藩友善太守牧蔚關文蔚書院延之主講校刊吳詩集覽東巖訂正爲多嘗游暖泉樂其風景爲詩文記之一時傳誦

正黃旗八蘇木土名古城子隸豐鎮縣有文廟古蹟元皇慶元年春正月立碑一

道上書集寧建立大成至聖文宣王廟云云未有翰林學士承旨榮祿大夫知制誥兼修國史選授平章政事致仕臣閻復議述又有宣授集寧等處前民匠總管

府達魯花赤陞斷事官完顏元集寧總管府達魯花赤魯判口總管完顏克孝按

集寧在金屬撫州

明昌三年以春市場置

元中書省統腹裏之地凡路二十有九曰大都曰

上都曰興和曰德寧曰淨州曰泰寧曰集寧

本金撫州縣不知元子何年升置改隸

鴛鴦灤今興和縣鴛鴦河也發源于正黃旗五股泉西南流至元山子謂之鴛鴦河即遼景宗興宗道宗屢幸之鴛鴦灤又東南流逕二道河村北注于後河東流入直隸界

宣化城東南三十里鷗兒嶺即古藥兒嶺唐李可舉破李克用兵于此

多倫縣以多倫諾爾名按多倫華言七諾爾華言河泊也志稱七星潭一名多倫泊即此

飲馬長城窟卽白道泉綱目集覽云白道在古雲中郡省志云大同北有白道泉

一統志新雲中在大同北郭外古雲中在豐勝之間姑錄之以待攷

醜都者承乳車之名也

元史兵志馬政

名忠勇之士曰霸都魯勇敢無敵之士曰拔突見

元史宿衛志清代賞軍士有巴圖魯勇號殆本於此

常遇春懷遠人從明太祖征代有功洪武二年元將野速復侵通州遇春征之由

遵化鹿兒嶺敗元將江文清于錦州至大寧野速逆戰敗走破開平元君又北奔

追至北河俘斬其宗王慶生等進攻大興遇春與副將李文忠出兵伏其歸路兵

果夜遁大破之斬其將鼎住凡得軍士車馬牛羊無算全師還燕至柳河川

宣化城北

十五里

以疾卒追封開平王諡忠武又有湯和鳳陽人同徐武寧王達襲元帥擴廓

帖木兒取寧夏東勝大同武寧師還和東至宣德拔其城吏民悉降因上言請詔

徙吏民關南配居固安永清等處歲遣將卒來守規置武衛是歲興和雲州應昌

山後縣郡悉入中國版圖云和卒封東甌王諡襄武

吳肇昌河南人崇禎壬午以推官分校晉闈魏敏果公所得士也國變棄官入蔚

敏果爲僦屋以奉之同時孳昌鄉人江桂庵禹緒許鷗湄汝都及粵東凌十齋雲俱宦游投閑避兵于蔚相與結詩社倡和州中名勝題詠殆遍亂定始歸而禹緒居蔚踰十年爲最久孳昌歸後一肆意于詩酒自號埋庵以忤權貴陷獄破其家鬱鬱卒

胡守訓字六守宣化人萬曆經魁文章直逼秦漢詩詞沈雄藻麗字工歐顏筆法塞上碑碣記序多所撰述其代直指劉公策上代王書字挾風霜尤足千古著有在茲堂稿又倪顯字日章號雲巢以祖蔭鑾儀衛整儀尉陞冠軍使遵例陳言直指兵民獲兪旨直聲振一時後以葬親歸遂絕意仕進日與戚友看花命酒吟哦不輟著有轂音草

胡公朝陽觀有平看飛雨溼晨鐘句

魏敏果公蔚州宋烈女石碣銘記宋典姐事甚詳康熙四年正月二十三曰蔚州衛西崖頭烈女典姐死死之日年十七父宋有懷母裴氏無子典姐先是許字州民蘭尙安字州廝兩姓皆農以羅帕約爲婚未及娶州廝暴亡其家距西崖頭二

十里赴至女涕泣絕食乘間裂原聘羅帕自縊死有司具事請旌表學使蕭公惟豫上聞報可朱竹垞宋烈女行紅羅持作帕素練持作巾何必合衾幃始爲同心

人宋氏有女典生長蔚之野西崖之山年紀十五餘許配千字村村民蘭州廝大

義結夫婦忽登泰山籙人壽不得久女方曬穀聞之聲悲哀

縣志云訃至女方代母舂穀

長跪

告父母兒當從黃泉下信誓旦旦不可乖父母向女言尊章爾未事慎勿捐形軀相保親父子各各還室中涕淚終不止月正三十日其日二十三白日從東來奄忽墮西南闔門夜無人女向空庭坐攬我素練巾接彼紅羅帕徘徊寢室旁自掛中門下父母啓視哽咽不得言觀者四方至歎息日暮還童童悒悒側乃有松柏林誰言寸草莠乃有松柏心

蔚州劉烈女俊姐農家子也年十七未字乾隆十年八月隨父築塲父偶出爲雨所阻村惡少劉漢千突來逼女力拒不可犯石碎其首而死閻介年作劉烈女行又董貞女幼字李生士瑜未昏而士瑜歿女聞訃易服奔喪旣留事舅姑矢志守

貞足不踰戶學使者旌之靳知州榮藩撰董貞女碑

鄒森字漸齋蔚衛義民銘之孫也嘉靖辛卯舉人未仕而卒初義民嘗積書萬卷每卷題曰賣者不仁買者不義且曰吾子孫或有能讀者森生而清慧體不勝衣弱冠以仲尼徒自許下帷數年積書凡再讀每究心陰陽象數鬼神禮樂之故與尹太守子莘商訂之走一矇往來傳誦數千言無舛謬尹撰兩鎮三關志森讎校足多焉森所著有觀心約垂百年湮沒不可考詢鄉人武之烈偶從市上得原稿衛澹足水部爲梓而傳之

飛狐口在蔚州城東南三十里今名北口峪亦曰神通溝俗又稱爲黑風嶺明楊嗣昌有蜚狐口記清吳孳初靳榮藩張道渥俱有詩按魏土地記曰代城南四十里有飛狐關遼史地理志相傳有狐于紫荆關食五粒松子成飛狐故名清聖祖幾暇格物論云飛狐產于口外密樹林中形似狐肉翅連四足及尾能飛但能下而不能上續博物志云飛狐亦名飛生今山陝有飛狐嶺飛狐口當時以物產得

名而名勝志有狐食五粒松子遂成飛仙其說荒誕皆因未知天下有所謂飛狐者也

元文類苟宗道蔚州元氏怡齋詩注蔚州元氏兄弟八人皆秀而文義居無間言故勝其所居之室曰怡齋諸名公皆有詩西溪秋澗其首倡也

尹子莘先生上谷歌大寧無路接開平極北孤懸獨石城嘗憶先皇親躍馬直過元石遠提兵寒流汨汨交樵徑野戍荒荒列漢旌十載土人談往事伯顏山下有英聲

春明夢餘錄云明初于古會州之地設大寧都司爲外藩籬又收山海關喜峯口古北口黃花鎮潮河川爲內藩籬永樂中遷都北平掣回大寧以其委朶顏福餘泰寧三衛而內藩籬爲界大寧旣棄則開平興和不容于不失宣德中移守獨石勢然也

王軌開平衛人

赤城志書王軌江南江都人開平衛官籍學
生歷任兵部尙書又云游藝至開平附籍

明弘治十二年進士

嘉靖初官順天府尹房山地震軌言召災有由忤旨切責尋遷右副都御史巡撫四川討芒部土官隴政擒之招降四十九砦璽書獎勞拜軌工部右侍郎改戶部勘御馬監草廠釐地二萬餘頃募民以佃房山民以牧馬地獻中官韋恒軌釐歸官奸人馮賢等復獻中官李秀秀爲請于帝軌疏劾之帝雖宥秀竟置賢等如律出覈勲戚莊田請如周制計品親疏以定多寡非詔賜而隱占者俱追斷戶部尙書梁材採其言併兼者悉歸官軌居身儉素爲摺紳儀表累遷兵部尙書參贊機務詔舉將材薦鄭卿沈希賢等二十一人帝皆擢用焉明史有傳

江寧處士司馬楓別號丹林流寓北方題獨石亭壁七律四首時同治六年冬十月也蹇步鈴聲澀橐駝塞寒太緊想巖阿風饕陡覺入松急雪澤遑云宜麥多寄慨遐荒愁積重棲遲大漠氣違和飛沙枯草昏晨夕畫角催殘勅勒歌其一羸幕腥羶苦逼人戍樓底事不因陳縱饒天設連峯險爭奈時遭匝地貧鄭俠畫圖今慘目李陵弓馬昔傷神烽烟告警憂如杞漸凜堅冰草莽臣其二邊城坐倦夢梅花驚

覺歸魂惱亂鴉子美有詩半羈旅通明無計早移家就瞻愛日神京遠惆悵沈霾

古道斜垂老尙思倚長劍肥羊火酒興誰賒其一一枝彫幹起蓬蒿空際將撻萬籟

號寂寞鵬程雲影淡頽唐鴈磧月輪高眼分青白徒懷籍手點丹黃勝讀騷癡立

蒼茫回首望役車何處罷聞磬其四夫人張氏可貞亦有寄慨一首詩云深閨生長

路何諳夜走開平亂待勸半壁河山間塞北六朝花鳥膽江南碁中殘局琴中慍

紙上雄兵枕上談猛訝雲州輕割賂契丹曾此視耽耽又明正統己巳之變千總

田坤戰沒女年十九痛君虜父亡不勝義憤遂投龍門峽死即所謂舍身崖也土

人穴石壁瘞焉天順初特旨旌之司馬丹林與夫人安肅張氏聯句題烈女田氏

墓作四解洵可傳之作

林春字孟暘其先家天台洪武中隨父戍龍門所景泰中以孝廉判應天有廉聲

卒時貧無以斂僚友賻而歸之巡撫葉盛歎曰漢世循良能若人過耶表其宅里

曰清勤

蒙園紀聞終

男肇夔同校
祥

自序

余曩輯蒙園紀聞邊隅文獻略可蒐討今歲捧檄遠出重關滿目荒涼羌無可語
寶昌隸元興和路距上都不遠入秋見雪轍迹所經殘垣廢壘而已古蹟渺茫徒
深感歎政暇檢敝篋舊書數卷不時披閱雜以聞見與邊事相關者手抄成書名
曰寶昌雜錄備忘也昔定厂先生出居庸與反彘者相搗戲乎萬山間謂足以傲
古人今踰居庸又數百里邊政闢新漸化蒙俗又豈不足以傲定厂哉他日携歸
鄉里幸勿詖爲遼東豕云辛酉嘉平月除夕存叟識

寶昌雜錄

江都董玉書拙脩甫輯

寶昌設治自民國七年始以太僕寺兩翼清丈行局改設考元史地理志興和路領州一爲寶昌州一統志興和城在太僕寺左翼牧廠西南二十里南至張家口百里即今張北縣治今左翼牧場鑲黃旗有慶國禪寺基址存殘碑片石上有元致和元年及興和路寶昌州等字前局長林子清遂襲舊稱呈請都統核定

太僕寺左翼牧廠按一統志在張家口東北一百四十里喀喇尼墩井漢上谷郡地元雲州及興和路東境今之左翼地在興和城東與古合第喀喇尼墩井不知在左翼何處待攷

太僕寺右翼牧廠舊在張家口西北三百十里齊齊爾漢河漢雁門疆陰地明爲大同邊外在今豐涼之間殆後遷移至東北耳

模範牧場即清御馬廠也一名上都牧廠在獨石口東北一百四十里博羅城漢

上谷北境唐奚契丹地金桓州元初開平府後升上都路明初置開平衛宣德五年徙衛治獨石口遂爲邊地

鑲黃正黃正白三旗牛羊羣設總管一員總其事今兼明安牧場場長清康熙四十年奉旨牛定爲三萬頭羊定爲二十一萬隻每年查核一次孳息者有賞虧耗者有罰凡遇壇廟祭祀春秋二季太常寺官來羣挑補又內庭祭祀及御茶房備茶乳牛暨恩賞王大臣官員人等牛隻俱由牧羣支給每年例進御膳房乳酥油一萬一百二十二觔十二兩乳油四千九百二十七觔八兩大乳餅一千觔小乳餅一百五十八觔零又每春秋二季鉸取羊毛交張家口稅務監督揀淨交武備院倒斃牛隻皮張交稅務監督選二千張交武備院餘者賞牛羣各二張羊羣各一張再有餘剩變價交廣儲司又倒斃羊皮亦交稅務監督三分選一交廣儲司餘二分給賞三旗牧丁

鑲黃旗牛九十五羣羊一百八十羣正黃旗牛九十五羣羊一百八十羣正白旗

牛九十五羣羊一百八十羣

民國以來三旗牛羊羣疊經匪擾搶掠無算歲有孳生亦難足額每年俸餉不能發給至民國十年陸軍部將各羣牛羊悉數分給各牧場牧養以之補助牧場經費

明安廢驛在牧場南稍西土名五藍城城西有西涼亭又西卽白海子

定邊河碑在張家口清張鵬翮使俄日記定邊河旁有一峯聳立碑曰姑石兒路通志碑無年代可考惟地名不類漢語疑爲元以前所刻云又吳縣范昭達從西紀略云四月三十日發宣化已至沙嶺午微雨抵何家屯卽張家口境定邊河流其左姑石兒路峙其右云云予旅垣數年屢訪之未見其碑

客歲庚申游興和某寺見廊下有銅甯一上刻梵文數字詢之喇嘛云不善誦經者推轉一周抵諷經一遍後見山陽阮葵生蒙古吉林土風記轉經蒙古奉佛惟謹木輪中貫鐵樞可轉動集梵經于輪間大者支木架以手推之小者持而搖之

旋轉如風謂一轉功德與持誦一過等

木蘭秋獮爲清代盛典邵陽魏默深綏服內蒙古記云木蘭者圍場之通稱也自順治初世祖出張家口獨石口外行獵次上都河入古北口爲塞外秋獮之始康熙中蒙古諸部獻其牧地規爲圍場東西三百餘里南北二百餘里周千有餘里即元代上都遼金中京上京之地康熙三十年圍場在多倫泊

即今多倫縣

四十年始建避暑山莊于承德府之灤河今人但知圍場在熱河罕有知其始于多倫者

蒙古諸山多以鄂博名蓋蒙人不建祠廟山川神祇著靈應者壘石象山豕懸帛以致禱報賽則植木表謂之鄂博過者無敢犯見阮葵生蒙古吉林土風紀方恪敏從軍雜記亦云鄂博謂神所棲經過必投以物物無擇馬鬣亦可將誠云按周官有犯軼之祭封土爲山象以菩芻棘柏爲神主鄂博意亦近之

吳縣陳黃中蒙古邊防議云塞外大寧開平興和東勝舊地皆牧廠之區熱河八溝營鄭家莊雖分列駐防而由河屯營以西開平舊衛其街陌遺蹟尙存興和現

有屯田客戶獨石口外則有紅城歸化城爲東勝舊地彼處土泉深厚水草豐美宜于屯牧使于開平故地設屯牧使一人總領其事復分設四路同知隸之畫疆分駐聯爲應援現今內務府上三旗及諸衙門閒散之丁約數萬漢軍披軍外閒散者亦數萬徙之塞下使各食其力每歲撥發三萬人復募邊民願往者各給以籽種牲畜令其分地屯牧擇其中之驍捷者教練爲兵外收屯牧之功陰寓從戎之計將舉京師數十萬之游惰悉納之尺籍伍符各遂其俯仰之資國家收鎮戍之用惜此議不果行坐使棄利于地地荒民貧以至今日國家爲救貧計但知放墾斂財以充軍需若不移民實邊恐地方仍多荒廢難治也

山陰余宥著塞程別紀有云郭家屯南去古北口北去北岔東去喜峯口西去獨石口各數百里此爲要中形勝今雖有數十家住此耕牧不能盡地之利宜發更番謫戍與凡有罪願贖者萬人于此屯田兼以畜牧灤河從西北來寬一二十丈深沒馬腹產魚最美卽灤鯽也擬從其下流凡經過山口石峽間可闢者闢之蓄

水使倍深廣冰渙時可通舟楫達內地夏五六月間亦可用爲灌溉曾見歙中山上田引山泉灌之嫌其冷糞以石灰灰性熱在冷泉中亦能發生故也此法即不能通之塞外但就現在土著所宜種黍麥之類俾萬人墾之自食有餘矣若使兼利蓄洩通貨財濟有無則此萬人所力運可食數萬人漢時玉關外有都護官宜于此立都護府如趙充國班超唐郭李宋韓范元耶律楚材等輩人物經營十數年間當必雄視朔方威震萬餘里外無疑矣

孫文定公嘉淦奏請開平輿和添駐滿兵一摺其略云獨石口一處氣候甚寒不宜五穀重山石田無可樵採故薪米俱貴山溝之寬不能十里加以河流冲刷不能蓋造營房之地若使強爲區處而駐兵旣多柴米一貴耕牧無所實于生計無益查獨石口外北行三十里即係平原曠野土脈肥腴再五十餘里爲紅城子平疇沃衍遠勝于獨石口內再百餘里爲開平城即元之上都也城廣十六里有奇龍岡秀發灤水回環實屬形勝之區計開平紅城之間可畊之田不下數萬頃○

再張家口外北行七十里爲興和城西行百餘里爲新平城川原甚廣一望無際
土脈之肥過于開平計新平興和之間可畊之田亦不下數萬頃○今幸有此閑
曠田畝若令民人墾種擇其近城之地平方寬衍者畫爲公田其餘皆爲民田每
墾民田二頃者必令墾公田一頃民田以爲世業公田分給旗人得完租粟再加
之以月給錢糧衣食自益寬裕且山場可牧平原可獵弓馬自益嫻熟○臣于三
月十三日在獨石口草芽未青十四日至紅城子青草長大一寸氣候可以春畊
開平城外隴畝猶存碾碓猶在若非種植何以有此興和地氣較暖于開平其爲
可以耕種必無疑也○臣于明春飭地方官招民墾種遴員前往經理區畫三年
之間田疇可以盡闢然後漸次修葺城垣蓋造房屋通商惠工約計五年百物皆
備然後派兵前往駐防則凡邊外皆成樂土往駐之人自各便安天地之氣與人
相通人烟旣聚則天氣益暖天氣益暖則田疇益闢田疇益闢則駐防之兵可以
陸續增添然則所益于九邊之防維八旗之生計者億萬斯年而未已也按孫公

此奏語極扼要墾荒之地必以商賈貿易輔之然後貨物流通人民易集乾隆時
阿文成創辦新疆開墾召關內商人設市伊犁輕其權稅一時商旅遠集不數年
築城四座新疆從此繁庶此明驗也今欲經營塞外宜仿行之

畢七沁猶華言能書者傳言元太后命漢官寫經年久不歸安土于此

插蘇猶華言紙也亦元時造寫經紙于此者

蒙古謂雲爲屋禮風爲薩爾溪言雲起處主有大風也又謂天曰吞格利謂雨曰
博能即天下雨也格利華言帳房也台吉猶華言宗親扎薩即其相也那顏猶華
言老爺也博斯克華言滿洲帳房也阿冷勒百猶華言天晴也

阿布爾呼第十四臺正站有薪即查克木爲炭甚堅聞灰可以療胃病蒙古人並
以之催生木末可飼馬其質刀斧不能入若以足蹴之即斷

方恪敏公從軍雜記亦云流沙中生木名

查克塞外行人資爲爨薪微作
硫氣燒灰療胃病復利女產

黃羊名者倫盤羊名叟爾忒角長環盤于首乃羚羊之雄

以上見范昭
遠從西紀略

招華在張家口外三百里有城基周十里餘視積土之高以準牙城歷歷可數近北廢堵周立有碑載皇慶中加上孔子大成封號檄下諸路勒石廟學完好可讀蓋元靜安路集寧縣地而廢堵則縣學宮址也堂廡特高泮池橋柱礎尙存有石像二一侯服帶下垂劍一伯服執圭當是四配十哲之遺皆歛仆荆榛中矣碑陰列官吏姓氏外書名者又四等一鄉黨耆艾玉堂搢紳嘗以詩文褒頌輸所有贊成者一時習齋文士經生日以講承道藝者一里閭疏通慕義以勸工者一部民復其家以供香火者余手錄存之爲文以紀此桐城方恪敏公觀承從軍雜紀中所誌也按集寧孔廟碑庚申予在興和時曾據土人張輔臣抄送一紙已記入蒙園紀聞其地在今正黃旗八蘇木方恪敏公所云招華二字不何解或係蒙言留以待考

大青山在歸化城北三十里產石青歸化城舊名枯枯河屯蒙古謂青爲枯枯謂城爲河屯蓋因此得名也故明妃冢亦稱青非冬草猶青之說

蒙古西城祈雨以楮達石浸水中呪之輒驗楮達生駝羊腹中圓者如卵扁者如虎脛在腎似鸚鵡嘴者良色有黃白駝羊有此則漸羸瘁生剖得者尤靈

諾明戈壁舊有石臺呼爲達蘭土魯相傳漢時築蒙人謂七十之數爲達蘭峰爲土魯今其處平沙無山或云峯乃烽之訛古謂墩爲烽漢時傳烽塞上此爲第七十烽猶今言七十臺也維土石爲之石瑩透如晶玉蒙古謂青金石爲諾明

厄爾得尼在喀爾喀王策令部內厄爾得尼寶也招乃招提省文地產金銀故稱寶寺寺前有元至正年梵書碑文

駝具十二肖形鼠目牛蹄虎耳兔脣龍額蛇頸馬腹羊首雞膺犬股豕腎瀚海乏水草惟駝不畏牛食已復出嚼爲齧齧一作呵韓詩合口輒嚼如牛呵駝能回嚼則不飢乏

盤羊卽羴羊喜行山顛仄徑中狼自後撓之還與狼鬥其角視水牯爲大而作勢常猛狼徐避去如是者數四力憊而墜狼遂食之其角爲齧有遠響

獺有二種馬獺大脂黃羊獺小脂白蒙人資爲肉食其皮爲裘毛色春青秋黃與
艸同候性潔窟中有上下層上臥如床而糞溺其下更穴其旁以積草禦冬

綠旗兵屯糧于吉爾馬泰元太祖曾墾種于此田鼠曰吉爾馬有曰泰

得理蘇草潔白光朝京師用以織涼冠一冠值數金

亦云德勒蘇上紅
下綠經霜彌勁

沙葱細于葦錐長數寸辛香可食駝嗜之而肥唐時休循部居葱嶺下

役外藩者持理藩院印票所至借羊馬如數羊或全或半或一蹄視使者貴賤婦
子露處空廬帳以居使者名爲拏鷺拉卽捉役之謂始於康熙年間諸藩咸願效
公遂著爲例按都統署今有鷺拉票意殆近此

張家口外九十里山名察罕陀羅該爲白首六千里至軍營糧城山名察罕搜爾
爲白尾中間如住魯科山爲心鄂姑思奇山爲肺額思格山爲肝阿魯山爲脊亦
如勾曲地肺大區地喉岐山地乳之類蓋諸藩地境起止聯如一身也崑崙柱天
萬脈由起西北綿亙幽寒莫詣爲背爲項爲脊爲髀見赤霆經

索倫八圍隸黑龍江將軍即古黑水部其人勁弓善射以獵爲生衣帽皆以獺皮爲之準夷畏之見輒卻走定邊右副將軍塔爾岱黑龍江新滿洲人屢戰有威名戴獺皮小帽如索倫製準夷稱爲獺帽將軍

蒙古人名椎者身不滿五尺雙瞳碧色三十里外物大如羊能辨其形極塞山川起止名目靡不備悉如所嘗經泉伏蒿沙中旣識其處再至雖昏夜不失塞上雪密爲舒里罕與暴風塵起皆易迷道椎在則萬無一慮特賜三品職寵以英冠軍行則從蒙古謂經典曰椎讀若吹

烏鼠同穴科布多河以東徧地有之方午鼠蹲穴口鳥立鼠背蒙人謂雀爲鼠之甥鼠名鄂克托奈譯曰野鼠色黃雀名達蘭克勒譯曰長脛雀按陝西渭源縣有烏鼠同穴山鼠名鸞雀名鷄

畢赤克圖有字之謂也山在頡颯之南石壁如削鑿度人經用古梵書填以黃金旁有畢赤圖壩四楷字蓋元時遺蹟也

薩克里山麓有石人具蒙古冠服相傳元太祖像

喀爾喀韓山諸部夏晝冬夜至六十三四刻地軸已高晷影爲近夜帳恒明

阿爾泰山譯曰金山或云即古金微極高峻科布多箭橐也

愛拉克譯曰酸乳烏卜藏譯曰寶藏

準噶爾本蒙古厄魯特人元置駝馬牛羊四部分駐西北邊準其牧馬部也今外藩四十九家多元後裔準噶爾語言文字皆同蒙古而諱言爲蒙古人

廣南巴爾薩油丁香油皆能治凍瘡塗手鼻不皸

以上見方恪敏公從軍雜記

和闐以產玉聞天下葉爾羌次之皆有玉山玉河定制春秋采玉二次葉爾羌舊

不產玉自隸版圖漸生玉石辦事大臣祭河神乃產玉埒和闐其山曰密爾岱山

距城四百餘里山三層上下皆石惟中成玉極望瑩然人迹所不能至也采者乘犛牛迺及其巘鑿而隕之重或千萬斤以準噶爾鋸截之而使溫都斯坦玉工治之色黝質青聲清越先後貢玉磬各若干事又貢玉冊玉寶各八十具白微黃者

貢宗廟白微紅者備慶典嘉慶四年常貢外准民自采是歲葉爾羌獲大玉三青者重萬餘斤葱白者八千餘斤白者三千餘斤上以沙磧輦運勞人急捐罷之至今存哈喇沙見魏默深勘定回疆記又滿洲七十一新疆紀略云葉爾羌有河產玉石子大者如盤如斗小者如拳如栗有重三四百斤者各色不同如雪之白翠之青蠟之黃丹之赤墨之黑者皆上品一種羊脂朱斑一種碧如波斯菜而金片濕透者尤難得採玉之法遠岸官一員守之近河岸營官一員守之派熟練回子或三十人一行或二十人一行截河並肩赤腳踏石而步遇有玉子回子腳踏知之鞠躬拾起岸上兵擊鑼一次官即過硃一點回子出水按點索其石子俗稱回人以把把爲尊敬之詞按七十一回疆風土記云回民過年之前一月即把齋起凡男女十歲以上皆于黎明後不得飲食甚者津液亦不敢下咽方爲善把稱回人以把把謂此日落星全方恣意飲啖但不得飲酒近婦人毛喇阿渾等禁忌尤瑣至次月初一或初二總以望見新月如鈎則開齋過年矣回語謂之入則

口外放墾凡不堪種植地悉云蕤蕤草灘曩讀紀文達公烏魯木齊雜記云芨芨草生沙灘一叢數百莖莖長數尺卽漢書息雞草土音訛也班固謂馬食一本卽飽然馬殊不食按蕤蕤與芨芨音相近文達證以漢書卽息雞草當從紀說以正之又文達公云胡麻卽脂麻東坡集言之甚析而西人以大麻爲胡麻其油氣味甚惡非土人不能食也今塞上新闢之地以播穫胡麻爲大宗農人慣食此油然其味殊劣非煉熟則不堪食

又云青稞乃大麥之類可釀酒亦可秣馬人亦可作麪食之向修熱河志書于烏桓傳中得此名而不能指其物頗疑爲萑稗之屬今乃識之予查字典稞音科青州謂麥曰稞一物不知儒者之恥洵然

跳兔身長五六寸尾長四五寸許尾末色如銀鼠前股長僅盈寸後股長至七八寸耳如箭筒又一種耳僅寸許者騰躍如飛考爾雅西方有獸曰麇亦前足短後足長然走則顛躓非跳兔類矣

蒙古野驃謂之七刻貪色黃頗稱駿覓水者視蹄涔掘之泉見焉性善奔逸射得之重可數百斤一駝僅能載一野驃以上見滿洲馬思哈塞北紀程馬公隨綏遠大將軍裕親王奉命出征準噶爾事在康熙二十九年夏四月

乾隆中大軍勦準回二部及討蘭州石峯堡逆回輒以阿拉善所部爲軍鋒故阿拉善兵稱虜雄晉爵親王

初河套有花馬鹽池鄂爾多斯部據之西有吉蘭鹽池阿拉善王據之其法皆于兩池置官收稅聽蒙漢人轉運不問所之而甘肅民食花馬鹽者十之三食阿善鹽者十之六陝西民食亦居其三吏恐侵潞鹽引地止許運至皇甫川云見魏默深綏服厄魯特蒙古記

農人耕田有得獸之助者其獸名四不像以其非牛非馬非犀非象也而獨具靈性生長山中不擾人間一物農人吹胡笳獸即聞聲而至至必以羣可以任打磨犁田載物諸事設此事但須一獸則留其一而餘俱引去待事既畢即歸山中人

見其勞也而與之食獸亦不食其勤儉有如此世之貪得無厭及無功食祿者不幾此獸之不如耶見琿春瑣記異域錄稱之爲角鹿清文彙書云四不像牝牡皆有角食苔則稱角鹿

塞北遠征行人駝馬全資飲料每有日行百里未得一掬水者湖北吳某北游紀略云至戈壁黃沙浩渺不見人人馬渴甚無所得水掘地至數丈始見涓滴以不敷用爲慮有善察泉脈者四周審視指一處沙眼稍爲凸起曰此下當有伏泉掘之果然衆大喜

蒙人夏食酪漿酸乳冬食牛羊肉近亦有食麥麪者貧人則但食乳茶度日又有奶子酒縫皮爲袋中盛牲乳束其口久而釀成味微酸謂之搵酒

前清考牧按立馬年限先後分爲三限取孳謂之三年一均齊牛以年限先後分爲四限取孳謂之四年一均齊駝按孳生定例分爲五限取孳謂之五年一均齊羊以立羊之年定爲一限取孳謂之一年一均齊

馬三匹每三年取孳一匹牛十隻每四年取孳八隻駝十隻每

五年取孳四隻羊十隻
每一年取孳三隻

回人用刀長尺許刃兩出極犀利謂之攆子按俗稱小刀爲攆子蓋始于回部也喀什噶爾通烏什山陰道北石似人形相傳昔有布魯特頭目之子入山逐獸迷踪不返其妻追至此處凝望號泣三日化而成石

左翼牧廠鑲白旗界有威安寺俗稱馬拉蓋廟創建已久至民國五年蒙人積資重脩佛殿前之有蒙漢碑文兩道地屬張多通衢近有汽車往來於此距寶昌約五十里辛酉冬十一月天晴無風驅車一往見二三喇嘛略坐片時而返

草地蟲飛薨薨頗礙旅行馬思哈塞北紀程云有小飛蠅如點墨隱約來目中隨有小蛆墮入目睛頃刻長四五分不治目竟失明治法以羊肉炙熟敷目上頃蛆盡出復明如故以故凡行者必以紗幘目避之

塞北無論冬夏日狂飊怒號驚沙撲面卽五六月煩歎絕少一晝夜間而四時氣備大抵晝則衣裘午則易絺穀午餘則挾纊而夜則被毳革焉炎夏如此窮冬沍

寒凜冽更復何如古人云積雪沒脛堅冰在鬚猶淺乎言之耳

大同有九龍壁在城內和陽街東北蓋大同爲遼金舊都國子監在焉明建代藩取其地爲邸故有是照壁前有二池池中清水返照則九龍鱗甲森動

上華嚴寺在大同城內寺爲遼時古建築誠塞上偉觀也寺有遼太康二年之經幢最爲寶貴丁巳春暮曾赴大同晤雁門單道尹味仁偕徐震生往游並以經幢拓本見惠至今寶之

口外地名有某某團圖之稱按此二字不見經傳詢之土人云卽堆積物件空院之謂其音則讀若闊戀蓋相傳俗字也

陶宗儀輟耕錄白翎雀生于烏桓朔漠之地雌雄和鳴自得其樂世皇因命伶人碩德閭製曲以名之楊允厚灤河雜咏有白翎隨馬叫晴空之句

太僕寺牧廠素以產蘑菇名每屆秋七八月間土人入山採取其色稍黑以白爲最味絕鮮又沽源黑河等處蘑菇形如猴頭者良統稱之曰口蘑又曰營頭蘑菇

元周伯琦上京雜詩菌出沙中美

黎子受凍其堅如鐵以井水浸之味回可食亦奇事也

凡凍耳鼻即以雪揉之方回近火則脫

蒙古謂虎爲巴爾圖

灤河鯽有斑無鱗食品中最美者吳穀人熱河小志曾記之今上都河亦出魚未知孰勝也

關東諺云東三省三樣寶人參貂皮烏拉草按烏拉草色深碧其細如髮長者有四尺餘山腰石罅茸茸下垂潤如絨纓入冬不枯其質軟韌性溫能禦寒避濕土人採之俟其稍乾揉之軟熟鋪臥榻代絮褥用方尺牛皮屈疊成履形內實烏拉草覆及足背因用此草薦履即名其履爲烏拉俗又書鞞鞞水濕不透寒沍不侵價廉工簡凡行旅工役無有不御此者昔五季唐同光二年渤海王大諲譔進貢人參松子昆布貂鼠皮一褥六髮靴革其髮靴革蓋即今之烏拉履歟按烏拉草

一名護臘草

喜峰口古松亭山也遼史爲松亭關隸中京留守開泰中置澤州俘蔚州民立寨居之王沂公會行程錄云松亭嶺甚峻險今喜峰口東北有小城曰徐太傅城爲明徐中山達所築昔有人久戍不歸其父來尋適遇此山下相抱大笑喜極而絕遂葬于是俗因謂之喜逢口後訛爲喜峰許有壬圭塘集載之頗詳

五代胡嶠北行記所載早金蓮大如掌金色爍人青囊如中國金鐙而色類藍二種皆有之又有離婁開花如雞子殼中含雙蕊色若蓮瓣嬌艷可愛一名蘭茹明蔣一揆記云黃花鎮有禮鼠色如貂而毛淺冬時聚榛實爲糧于穴中作歧穴貯之若倉困然多至三斗其榛實皆美好價倍於人所收者山氓多掘取之鼠失榛實牝牡皆掛脰樹枝懸死若縊鎮將憫之爲禁甚厲然不能止見高士奇松亭行紀

清代行圍講武每獵則以隨駕罩密布四圍旗色分八部各以章京主之分左右

翼馳山谷間踰高降深名曰圍場惟視藍旗所向以爲分合有斷續不整者即以軍法治之章京服色亦隨本旗惟御前侍衛及內大臣得穿黃褶行圍之法以鑲黃旗大纛居中聖駕在大纛之前按轡徐行兩翼門纛相近則立而不動以俟後隊漸次逼迫謂之合圍緹騎環山旌旄炤野狐兔麋鹿散走圍中或皇上親射或皇太子射之親王大臣近侍非得旨不敢在圍中發一矢獸有出圍者方許扈從諸人捕之亭午就山陽張黃幄尙食一日凡兩合圍約行八九十里遇虎則皇上親率侍衛二十餘人據高射之無不殪者若虎負嶠則遣犬撻之犬不畏虎隨吠其後或嚙其尾虎伏草間犬必圍繞跳噪人即知虎所在也虎怒逐犬出平陸人乃後施弓矢更有侍衛數人持槍步行俟虎被逐中箭必怒撲人隨勢擊刺亦無不殪者

圍中鷹犬各有專官主之犬以朱纓金環飾其頸牽者繫之於足見獸則出蹏從之鷹以繡花錦帽蒙其目擊者縮條于手見禽乃去帽放之高士奇扈從雜紀詩

有飛鞞金銜馳狗監離條繡帽脫鷹師之句

柳條邊插柳結繩以界蒙古南至朝鮮西至山海關有私越者必置重典故曰柳條邊也

古北口內某寺刻宋蘇文定公轍古北道中詩云亂山環合疑無路小徑縈迴長
傍溪彷彿夢中尋蜀道興州東谷鳳州西宋史元裕問轍嘗代軾爲翰林學士尋
權吏部尙書使契丹館客者侍讀學士王師儒能誦洵軾之文及轍茯苓賦按此
則奉使時所題也

保安城遙望鄭州城遺址東北有藥王莊爲扁鵲故里

元薩都刺天錫贈莫州縣尹詩云民居星散無官訟里巷秋深盡水田禾稼半生
城郭裏槐花亂落縣門前今治雖廢風景尙依然也

華表山在遼陽城東六十里丁令威學道于此去家千年化鶴歸來相傳譙樓上
石柱即華表柱也

火茸城金之上京會寧府也按金史上京路即海古之地國言金曰按出虎以按出虎水發源于此故名金源取建國號稱爲內地天眷元年號上京海陵貞祐二年遷都於燕削上京之號止稱會寧府大定三年復爲上京

南海子元時爲飛放泊至大元年築呼鷹臺于灤州澤中初改鷹坊爲仁虞院

英兒門有大金壯義王婁室墓神道碑上鐫王彥潛撰文任詢書丹考金史任詢字南麓易州人慷慨多大節書爲當時第一畫亦入妙歷官北京鹽史年老致仕家藏法書名畫數百軸王彥潛姓氏爵里俱不載

採人蘘者言于春中生苗多在背陰濕潤處初生小者三四寸許一極五葉四五年後兩極五葉未有花莖至十年後生三極年深者生四極各五葉中心一莖俗名百尺杵四月有花細小如粟蕊如絲紫白色秋後結子或七八枚如大豆生青熟紅自落採之之法以四月及七月裏糧入山其草一莖直上獨出衆草光與曉日相映則削取其根一窠或四五歧或二三歧者種有紫團白條羊角等名惟黃

潤堅實俗名金井玉闌者體實味甘斯爲最勝然秋冬堅實春夏虛軟故採獲多

在七八月間

柳邊紀略高麗人作人獲贊云三極五葉背陽向陰欲來求我椹樹相尋

貂鼠喜食松子在深山松林中一名松狗有黃黑二種紫黑色者蔚而不耀尤爲難得其窟或土穴或樹孔捕者先設網穴口後以煙熏之貂畏煙出犇即入網中又有捕貂之犬嗅其蹤跡所在守而不去伺其出嚙之

山鳥似烏而小赤嘴穴乳爾雅所謂鷦也

穉麥似大麥而大土人與稗米作飯頗滑潤名玲璫麥

高士奇有三餐但煮玲璫麥之句

甘肅山中有野果倒生不知其名土人以蜜潤之名倒吊果味微酸類柰而小

果子單土人以山查煮漿爲之狀如紙薄勻淨可卷舒色紺紅故名果子單味甘

酸止渴

金桃枝皮如桃而金色開黃花如迎春不香

賀蘭山在寧夏城西六十里山上多青白草望之如駁馬志曰夷人呼駁馬爲賀

蘭山故以此名

河朔見蒙古人以鞞貯衣韉其中縛之胸前泐水

神木漢之光祿塞又屬五原地宣帝時單于呼韓邪入朝遣使歸國單于請居光祿塞下有急保受降城自是烏孫以西至安息諸國咸尊漢云光武時日逐王北爲單于款五原塞願永爲藩籬即此

夜光木生絕塞山間積歲而朽月黑有光遇雨益甚移置殿上通體皆明白如螢火迫之可以燭物以素瓷貯水投之水光澄澈雨露日遠則光漸減矣

兩狼山即狼居胥山兩山夾峙中分一路沙深數尺流走不定馬蹄過處沙復掩

之夜靜有聲故曰鳴沙

以上見高
士奇各紀

西蕃山金虎軀如鼠而虎頭毛香如沈香性靈而悍夜伺駕鵝鴻雁宿時鑽入翅中嚙其頸怒飛而墮則隨之下而食之或潛身松枝俟麋過躍而踞其兩角之介食其腦擣觸之不得征厄魯特日始得其種云

查昇因墜馬手痛未愈十指不能屈伸比復發腫康熙帝傳令剖一羊乘熱以兩手入羊胃移時痛止指揮如意真神驗也

塞外螢火光如紅燈大如彈丸有蟲名雲虎赤鱗金色吐氣直成彩雲

山中野杏樹根堅韌斷而就其形加以雕鏤可爲香几筆架揩摩之色紅紫

烏喇柰一名歐李生于烏哈喇大之叢莽間味甘而微酸色如渥丹大者如梅杏性熱不可多食以蜜漬之亦能久貯一名歐梨又名歐栗子音訛也或云文忠公使契丹嗜此果因名之

細鱗魚長尺餘鱗細如粟金光燦目而鱗背上黑斑如豆排列成行魚腹一綫中分脊翅後多一輦翅鬣有重唇是魚中罕見者烏喇有細鱗柘條兩種

白椴木葉大如團扇初生可蒸冷淘霜後則鮮赤如楓其皮可治繩爲魚網之綱烏喇網大魚常用之亦可用爲烏槍火繩又有楮色紅鮮可愛乾之往往用以爲

杯

塞外天然鹽

即蒙鹽俗稱青鹽白鹽

出蒙古阿巴海部落地名俄充里不勞煎煮生泡子中

上下皆水中若層冰厚五六寸許鑿取成甌較之煎出味淡而色鮮

塞外湯泉甚多清時帝駕巡狩每抵湯泉沐浴謂之坐湯昔康熙帝諭云所歷湯泉如遵化馬蘭峪獨石口昌平及塞外近者哈貝遠者索約兒凡二十二處所至俱令西洋人以銀盃盛水重湯煎之俟水乾驗其底或硫或硝或鹽或碱各處不同大抵坐湯可舒筋骨兼療疾病南人未之知也

野豕大如牛形如彘豚而耳稍小上下牙如鋼鉤驅突時猛如虎兕

香薷十步之外芬芳撲鼻

塞外土產文玩帝駕行獵以賜從臣有瓊瓢千年古樹所生山杏根鎮紙赤莖芝

出興安嶺北落葉松下

空青石一圓而白外若指上紋而其中貯水隨勢轉蕩一紫紅色若寶石中有水沫流走不定俱異寶也

木靈芝寄生楊柳間枝分兩翠葉而果生于兩葉之中別有一種生落葉松上白如玉軟如脂大徑尺堅久不壞

金錢豹白毛黑斑形與虎肖頭微長而尾亦稍大利如刃爪銳若鉤

石熊全身黑猙獰可畏長喙鋸牙前掌如人手後掌如人足重七八百斤熊類不一有人熊馬熊豬熊樹熊石熊之別此熊頂生白毛乃石熊也

飛狐毛深褐色銳頭缺口如兔而耳差小尾之長與身等肉翅如鼈裙四足生翅

中前二足四爪後二足五爪騰起不過尋丈獸中之能飛者也

以上見長洲注瀨隨變紀

冷山宋洪忠宣公皓所居積素凝寒高出衆山之上土人呼爲白山以其無冬夏皆雪也松漠紀聞冷山去燕山三千里

邊外多山山間多樹者曰窩稽亦曰阿幾盛京志作窩集實錄作兀集秋筵集作烏稽

土炕高尺五寸周南西北三面空其東就南北炕頭作竈上下男女各據炕一面

寶昌雜錄 十五
夜臥南爲尊西次之北爲卑

寧古塔地不計畝而計响响者盡一日所種之謂也約當浙江田二畝零一夫種二十响收穀自一石至二石以上以土之厚薄爲等殺

滿洲呼有爵而流者曰哈番哈番者漢言官也遇監生生員亦以哈番呼之俗以文人爲貴文人富則學爲賈貧而通滿語則代人賈所謂掌櫃者也貧而不通滿語則爲人師師終歲之獲多者二三十金少者十數金而已掌櫃可約三四十金五國城就徽欽之死斷之似一城而五國其名者考遼史營衛志五國俱有國名曰剖阿里國曰益奴里國曰奧里米國曰越里篤國曰越里吉國則非聚居一城也或云寧古塔相近槍頭街有舊城址五疑即是而余以爲徽欽自徙鶴里改路之後未聞再徙則五國城自在鶴里改路境內而鶴里改者即虎兒哈胡里改之變書也槍頭街之說庶幾近之

使鹿部大約在使犬部之外實錄崇德元年五月阿賴達爾漢追毛安部下逃人

至使鹿部喀木尼漢地方至今未通朝貢無由見其國人但聞其駕車耕種使鹿若使牛馬而已

塔子頭

或名和尚頭

苗長尺許若麥門冬草春綠夏青秋白冬則以火燎之焦而黑矣

根紫色綫細若糾結成團堅如木石大者抱小者握自相聯絡參差立泥淖中土人有以爲枕玩之絕可愛

海豹皮出東北海中長三四尺闊二尺許短尾淡綠色有黑點京師人誤指爲海龍皮染黑作帽海龍皮大與海豹等毛稍長純灰色京師人又指爲海獺皮

楛木長三四寸色黑或黃或微白有文理非鐵非石可以削鐵而每破于石居人多得之虎兒哈河相傳肅慎氏矢以此爲之好事者藏之寧古塔紀略云混同江出石磐相傳松脂入水

千年所化有文理如木質紺碧色堅過於鐵土人用以礪刃名爲昂威赫卽古肅慎氏楛矢石磐王阮亭載之池北偶談中

蘑菇有雞髀猴頭之分此外尚有數種然箇莫大于猴頭味莫鮮于雞髀雞髀籬落間皆有之往吳漢槎還病且死謂余曰余寧古塔所居籬下產蘑菇今思作此

湯何可得

桃花水草本狀若楊梅而無核色紅味甘質輕脆過手即敗五六月間遍地皆是居人擇最多處設帳房或棚子釀分載酒男女各爲羣爭采食之

樺木遍山皆是狀類白楊春夏剝其皮入污泥中謂之糟糟數日乃出而曝之地白而花成形者爲貴金史所謂醬瓣也

牛魚鱗魚也頭略似牛微與南方有別重數百斤或千斤演繁露載契丹達魯河釣牛魚以占歲海陵集稱與金蘭酒賜使臣二老堂雜志亦云一尾之直與牛同則牛魚在遼金時已貴矣

康熙丙寅年沙兒虎舊城掘一銅章傳送禮部大若州印面篆合重渾謀克印六字背左一行楷書如回文右一行刻大同二年少府監造八字按大同遼世宗年號而謀克則世傳金爵也今觀斯印則金未建國號爲遼屬國時已有斯爵而後特廣之耳

福建陳昭令于沙闌北掘一鏡長四寸八分闊二寸五分四角皆委上凸下凹背有紐在其端中篆文曰俗號窗旁象二龍而各加劍于首一象水波紋又甯古塔有人掘一鏡背鑄銘兩行左一行不可辨右一行曰不劍而鏡

己巳年間人傳飛牙喀一碑本屬漢文而譯爲滿不能錄大要其地爲二岡國十年教養之後立此碑版後書東唐國鎮守滿種山將軍馬元亮又有都指揮同知等官名按中國無東唐之號豈高麗前代耶

凡臥處頭臨炕邊脚抵窓無論男女尊卑皆並頭如足向人則謂之不敬惟妾則橫臥其主脚後否則賤如奴隸亦忌之

葉赫老城在驛路旁新城亦可望見俱無人迹或曰前大學士明珠老城貝勒後

以上見山陰楊賓柳邊紀略

甯古塔相傳當年曾有六人坐於阜滿呼六爲甯公坐爲特故曰甯公特一訛爲甯古臺再訛爲甯古塔矣固無臺無塔也惟一阜如坡陀耳見桐城方拱乾絕域

寶日錄金
紀略又吳江吳振臣甯古塔紀略云甯古塔在大漠之東過黃龍府七百里與高麗之會甯府接壤乃金阿骨打起兵之處雖以塔名實無塔相傳兄弟六人各占一方滿洲稱六爲甯古箇爲塔其言甯古塔猶華言六箇也

凡出門不齎路費經過之處隨意止宿人馬俱借給少陵所謂馬有青芻客有粟也

滿洲人家歌舞曰莽式有男莽式女莽式兩人相對而舞旁人拍手而歌每行於新歲或喜慶之時上于太廟中用男女莽式禮柳邊紀略云男女更迭起舞大率舉一袖于額反一袖于背盤旋作勢曰莽勢中一人歌衆皆以空齊二字和之謂之曰空齊蓋以此爲壽也

見客俱延坐南炕內眷不避相見惟執手送客垂手略曲腰如乍別乍晤彼此相抱復執手問安如幼輩兩手抱其腰長者用手撫其背而已如以右手撫其額點頭爲拜如跪而以手撫額點頭爲行大禮婦女輩相見以執手爲親拜亦偶然耳

滿洲人不知養蜜蜂有采松子者或采樵者于枯樹中得蜂窩其蜜無數漢人教以煎熬之法始有蜜有蠟遇喜慶事漢人自爲蠟燭滿人亦效之

大馮三兄壬子拔貢在京考選教習得此人南北音信乃不阻絕賜還之事固同社諸公如宋右之相國徐健庵司寇徐立齋相國顧梁汾舍人成容若侍中不忘故舊之德而其中足趺舌敝以成茲舉者則大馮三兄之力居多

山海關即秦之長城第一關出關者稱爲懷惶嶺入關者稱爲歡喜嶺下有孟姜女廟

呼兒喀人賜以官爵亦不知貴將軍謂有爵者曰今已有官須學官樣一體上衙門次日有官者約同齊到有戴笠者有負叉袋者有跣足者見者無不大笑命坐即以叉袋墊地而坐雖衣大紅蟒袍其叉袋仍負于背不稍去以易于買物也後命進京有不願者聽歸本土一日數百家聚于郊外送別哭聲震天男婦相抱親臉唧唧有聲以此作別近于都中見之大非昔比禮貌言談亦幾與滿漢無異矣

鷹以海青爲第一等能捉天鷲一日能飛二千里又有白鷹蘆花鷹俱極貴重爲貢品

有果名衣而哈目克形似小楊梅而無核味絕佳草本紅藤生草中又有果名烏綠栗似橄欖綠皮小核味甘而鮮又有果名歐栗子似櫻桃味甘而酸

山查大而紅可爲糕余家常食榛子腐松子糕梨子雖小味極美梨與葡萄做糕色味俱精此二種內地所無

香瓜極香甜夏日盡飽無破腹之患冬日食油膩及飲冷水亦然所以各處流客

無不服水土者

以上見吳振臣寧古塔紀略

方恪敏公觀承未遇時變姓名爲馬飛熊往來齊齊哈爾左右其父登嶧袁簡齋載公句云龍來陰嶺作游戲雷電光中作雪花即此時作也久之父歿方嚴骸骨還鄉之禁公益之覺杖幾死頃復盜竟徒步負入關余嘗見土人家有行書一幅署名桐城方登嶧聞嘗撰卜奎雜志一書惜不傳

海公蘭察呼倫貝爾索倫也徵時爲流人朱姓御貨車往來奉天吉林爲朱所重
會金川用兵公以庫圖勒殺賊有功受知大將軍阿文成公由是累擢將帥爵列
上公相傳公貴還鄉宿朱家贈遺特厚又言公征臺灣接弟書訴某官詬罵甚公
怒奏調某爲戈什哈將報之久見某勤勇過人大呼曰幾誤我累薦某至協領皆
盛德事

阮侍郎葵生茶餘客話云猗氏衛爾錫旣齊撫黔時以苗變得罪戍黑龍江其友
劉六皆爲之經畫行李歲時餽問不絕逾年召還于此見前輩交誼古道照人

李徵君錯漢軍居盤山著尙史睫巢集世稱廡青山人有兄銀號伊山官佐領以
事謫戍徵君念其老病請假省事居匝月歸事載徵君行狀畫沙集有送季伊山
以運餉蒙恩解戍詩云雪消遼海霽雲開楊柳春風拂面來萬里羽書飛玉塞十
年塵劍走金臺輓芻應比蕭何力勒石原饒班固才行矣前程須努力湯憐羈旅
重徘徊陳蓋公梓爲徵君誌生壙稱其東涉遼有所會心輒沈吟延竚或窮險極

幽撫拾放失遇有道者必質所疑叩精理

一等男訥爾樸滿洲人康熙間戍齊齊哈爾與桐城方登嶧善著有畫沙集方君登嶧序云拙庵十三年居窮髮之地吟誦弗輟暇則以蹇衛曳短車出郭荷鋤移野卉數十種蒔階下非襟懷浩落烏能如此拙庵訥自號也

富察尙書傳鼎雍正四年以事戍黑龍江九年召還李徵君錯作家傳云公遭峻責被嚴譴所親代之憂公方率老僮腰斧伐木故上有以結主知而旁人莫窺其涯涘袁簡齋撰道神碑云公聞命負書一篋步往率家僮斧薪自炊于此見尙書行乎患難卓有本末

河南齊某戍黑龍江歿有年矣有子在籍願收骨而艱資斧僞屑豆爲藥且行且售病應手愈因得善價莫測其所以然也已負骨歸次行窩集遇三盜泣陳其事盜憐之贈金方拜謝一盜擗踊大號曰若藐孤不遠數千里爲此舉自命英雄如我可漠然置之邪因揖其黨云若等自便我且之肅州尋親揮手竟去事載紀文

達公姑妄聽之書中

有費姓者在齊齊哈爾貿易頗以信義稱一日致粳米一石于章君汝楠且留摺請憑此日取斤肉以養老章君訝非素識卻之費厲聲曰某非有求于先生以行誼過人而貧若是故分衣食之餘供養之卜奎之大安知無類某者聞風繼起則先生可以不死某豈有求于先生哉章卒不受費亦涕泣去章君作詩紀其事後程君煥和之有廉讓之間容我輩漢唐以後得斯人句費可不泯矣

松入黑龍江歲久化爲青石號安石俗呼木變石鄂文端公恭和御製瀛臺木變石歌有濡水不沈火不然句得石性矣唐書僕骨有康干河斷松投之三年變爲

青石名康干石殆即今之木變石歟

大同雁門道署有梧桐石余親見之殆亦木變石之類附誌之

關東諺云捧打鑿子瓢貯魚野雞飛在飯鍋裏

嬰兒缺乳伏山羊于炕使乳既久羊與兒皆習兒啼羊遽至狀如母子腓字誠非

妄語

邊地人家擅塵所需以狐尾爲之冬日遠行豐狐尾綴馬箠携以煖手狼尾亦間用然狐尾輕軟差勝余嘗謂狐尾拂塵雉翼扇火堪稱塞外兩解意奴或有句云塵消書案狐搖尾烟起茶鑪雉展翎能道其實

貂鼻七枚燒存性酒冲服之止胃痛土人試屢驗方書不載

挹婁出好貂見後漢書今之貢貂挹婁貂也

灰鼠尾長時時掉置背上自覆其首投以榛子雙爪抱嚙如猴然出諾敏河者號索倫灰鼠

哈什瑪田雞類也生水邊石罅土人嗜食都門亦重之

鱻鯉魚古名秦王魚音之訛也其魚頭骨關內重之以爲美于燕窩

達發哈魚未入呼瑪爾河取而乾之冬日餽遺與黑龍江凍豆腐並稱佳品

宋洪忠宣皓使金流冷陁寫四書于樺葉授弟子此樺葉見用于古人者

將軍觀明初下車察邊瑪玉爾

俄官名

過河來謁將軍不陳甲仗召與談帳中後瑪

玉爾見官兵稱將軍天人且有不名一錢我國盡知之語每官兵歸必傳語問將軍安

每歲五月布特哈官兵悉來齊齊哈爾納貂皮互市號楚勒罕譯言盟會也先是在因沁屯將軍都統率屬僚駐紮其地凡穹廬馬匹及羊酒皆布特哈按項供應後當事者誅求無厭布特哈苦之未有以發會部卒爲齊齊哈爾兵所毆走白將軍反得荷校罪于是副總管奇三列款潛之木蘭行在奏之勅重臣來省案問得實將軍副都統以下皆論罪奇三亦以越分上書戍伊犁余嘗見土人家清文一帙叙奇三上書始末甚悉且言奇三將上書請于其母母曰救一部出湯火即死不辱汝父吾何恨此文疑即奇三作亦達呼爾巨擘也然齊齊哈爾布特哈不相能自此始

達呼爾隨意造輻輳車輪不求甚圓轆不求甚直軸徑如椽而載重致遠不資轂輓惟山路崎嶇防損折動以斧鑿隨之

輻輳車牛曳之一童子嘗御三五輛載糧草類然富者乘之以氈毳爲蓋蔽風雨間亦用樺皮號樺皮車

扒犁國語曰法喇制如凌床而不施鐵條屈木爲轅駕二馬行雪上疾于飛鳥或曰此元時蒲輿路之狗車又聞吉林屬赫哲斐雅哈等處役犬如牛馬號使犬部二八月望日城南樓吹布楞即海螺也蓋古笳吹遺意

盛京通志雍正九年薩哈連蘇拉章京那莫善得一古刀光澤異常有若水珠一顆隨刀上下以手拭之全無痕迹

八旗兵例給弓箭外銅釜一口兩人共之晝可炊夜擊以警號鑼鍋蓋刀斗類也索倫達呼爾不諳農事康熙間特遣部員課其耕種嘗以郎中博奇課耕有法禾稼大收奉旨褒美事在十五年見盛京通志

齊齊哈爾烈女長姐馬甲長女也鄰人羅羅科逼污之長姐力拒被害事聞入祀節孝祠又官屯女殊色者某協領欲娶之爲二房女不可父母逼之以死誓曰兒

生官屯至賤嫁三品官至貴特未必相安且若家既有妻而又娶婦禮耶聞者莫不訾女福薄噫此獨非巾幗中有丈夫氣者歟

金史以犍皮爲角吹作呦呦之聲呼鹿射之今布特哈有哨鹿者即呼鹿也其哨以木爲之長二尺餘狀如牛角而中空國語謂之穆喇庫哨時若能肖游牝已憊

之聲則牡者牲牲來然不能人人擅長蓋亦有獨得之妙焉

以上見滿洲西
清黑龍江外紀

康熙三十年于嫩江東下魁村地方築城鄰近齊齊哈爾村即以爲名桐方恪敏公觀承著有卜魁風土記吉林英和著有卜魁紀略

柳蒿野菜名俗謂之額穆毗清語蘘曰額穆毗或即是此抑萁蒿之訛耶

淡巴菰草以東三省產者良今假借菸字讀若薦按菸有薦音故闕氏讀爲燕支

以上見卜
魁紀略

唐撫言宣宗賜韋燠孫宏銀餅餡皆乳酪膏之所爲即今乳酥餅也查慎行隨駕閱視羣牧詩有家家賜種孳蕃息銀餅渾如拒鬻香蓋即指此又云肉鞍高出草

頭低千百封牛褐色齊按漢書注駢駝背上肉鞍隆高若封土俗名封牛

桐城姚介石太守歸庵記云姚介石名興滇桐城巨族曹州太守乾隆己巳有軍臺之役軍臺者準噶爾蠢動設置塞北之郵遞也自張案口出關至鄂爾坤新城共二十九臺長亘三千餘里委蛇曲折臺丁就水草遷徙不常其實不止此也每臺處蒙古十七家于其間每年出資以養之介石派坐二十二臺踰瀚海西北更十餘程地名桃李樹木不生鳥獸絕迹悲風晝夜呼號飛沙朝夕霾霧飲惟酪食惟羶毳幕荒涼孤身寥寂冰山雪窖酷冷奇寒介石居常以命數自安處處尙覺坦然惟是其俗人物故後棄于荒野聽犬狼食之如食之速則以爲魂魄登仙不食則謂成鬼道矣人即畏之富厚之家亦不數日血肉未乾即火而棄之葬事固未之聞棺木從不之識介石以清白之軀既貧且老既老且病託迹穹廬草霜風燭未可定也固不敢以父母遺體飼犬狼卽委之灰燼亦所不忍聞北千里外爾登兆其地阡木稍可因託人購之木價二兩八錢運價八兩倘命數已定全屍而

南不亦幸歟語云生寄死歸故顏其前曰歸庵題之曰姚介石之柩僥倖生還作將來一段佳話未爲不可或謂之癡或謂之達不問也時乾隆十五年庚午介石年五十有六歸庵成因爲之記並附以詩死歸生寄兩茫茫不識他鄉與故鄉五十六年都是幻于今撇却臭皮囊庚午九月十九日介石自記並書

古人遠游塞外類多吟詠如唐李士元登單于臺云馬散眠沙磧兵閑臥戍樓金趙秉文塞上云廢城餘井臼古戍斷烽烟元張養浩上都道中云行人鬢有雪野店竈無烟元袁桷上京雜詠云馬鳴知電急雁遇識天涼門荒懸馬革草淨絕牛蹄坡凹茆結屋嶺轉水回灣草低鷹側目車逼馬迴蹄又客舍書事云竈冷廚烟濕窗低簷溜懸雲飛疑到地草長不知春周伯琦有句云有山皆積雪無水不成冰紀行詩云谷深幽境迴路轉列峯斜明釋梵琦開平書事云築城侵地斷居室與天連生涯惟釀黍樂事在彈弦有田稀種粟無樹強名村又漠北憶古云夏有九河凍春無三月花邊塞之景略見於此

元楊允孚灤京雜詠驅車偏嶺客南還始見村姬笑整鬢誰信片雲三十里寒暄

只隔此重山

人到偏嶺之北面不可洗頭不可梳冷極故也過此始有暖意

北闕東風昨夜回今朝瑞氣集蓬萊

日光未透爐香起御道聲聲駝鼓來

謂駝鼓也

紫菊花開香滿衣地椒生處乳羊肥

氈房納石茶添火有女褰裳拾糞歸

地椒草牛羊食之其肉香肥納石韃鞨茶名也

不須白粲備晨炊乳

酪羊酥塞北奇泥土炕牀銀甕酒佳人椎髻語侏離出塞書生瘦馬騎野雲片片

故相隨凍生耳鼻雪堪理冷入肝腸酒強支

凡凍耳鼻即以雪揉之近火則脫

買得香梨鐵不如

玻璃盃裏凍潛蘇書生半醉思南土一曲鐙前唱鷓鴣

梨子受凍其堅如鐵以井水浸之則味回可食

高士奇塞外雜詠詩滿磧閒花送野香窮邊六月始青陽紛紛蜂蝶須留意若到

秋來便隕霜

塞外五六月始有和色七月即隕霜矣

望中宮闕隔雲霞歎息今年負物華六月駝毛

飄滿地渾疑春盡落楊花

蒙駝于五六月脫毛塞上處處皆有風吹展轉如楊花

姚伯昂先生竹葉亭雜記云塞外竹枝詞注云基城主人俚調先曾王父曹州公

戲作也自識云盧抱孫出塞集有竹枝詞十三首工妙異常惜不盡夷民情事故

補寫之其已道者不及也續貂之誚所不計云到此寧教心不灰非風即雪更塵

埃氈幃幾處山坳裏一似生人作夜臺

夷民所處盡蒙古包多在山坳裏以避風雪上尖下圓頂微平圍以白氈渾似墓塚

席地鋪將幾片氈羊羔牛犢繫當前中央不是尋常火冬夏無分馬糞燃

幕中設糞火一

爐以便炊爨牛羊亦繫于側

鮮品何由到大荒夕飧一盃米稀湯頻年酥迭差

讀若

生活雖具

人身實可傷

夷地菜蔬一無所有以牛羊駝乳爲食呼奶茶爲酥迭差富者晚煮稀湯一餐長年如此釀成馬乳不須沽一品

波羅韃辣酥劇飲何嘗不晝夜從教醉倒在泥塗

以馬乳釀酒每飲必爛醉其波羅韃辣酥甚佳

家家來

牧叱牛羊幾處山頭下夕陽鄂博遙看知遠近如飛一騎馬蹄忙

夷人每出必騎騎必馳聘壘小

石于山顛爲之鄂博以誌遠近

偶爾驚聞忒默嗚嗚咽咽作哀聲淒涼境界傷心淚鐵石肝腸

亦動情

呼駝爲忒默

焉知地獄與天堂一定身屍飼大狼曾是衆生都不若尙教麻海

落人腸

人死必棄之野以飼犬狼食之速者謂登仙不食則謂成鬼人皆畏之肉名麻海

入門摩六各先施卜而汗尊西

北陲幾卷靈文勤捧誦慈雲妄想見牟尼

呼佛爲卜而汗叩首謂摩六各

男女咸欽是喇嘛恪恭

五體拜袈裟頂心一掌殊驕貴佛在何方莫認差

見喇嘛必五體投地如拜佛法然拜畢將頭頂就其側喇嘛則

以手摸其頂男女皆然謂其五指有五尊佛在其荒誕如此見面捫都禮數恭差烏纔罷又斟鍾瓜田李下尋

常事幕內公然温楊濃捫都問好之詞也睡謂温榻投宿者無論識與不識同處一席畢世何嘗見沐湯肌膚垢

汚齒牙黃焉支枉自誇顏色那得消魂別有香男女自出胎一洗終身不知沐浴裝飾珊瑚辮髮

垂羊裘狐帽賽男兒弓鞋笑說金蓮步手製新靴嵌鹿皮婦女不束腰帶穿辮髮飾以珊瑚對人

也解作嬌羞口肯連聲不轉頭臨上馬時纔一笑故翻纖手掩雙眸呼聞女爲口肯皆善騎

見慣夷妝別樣新一般嫵娜小腰身歸時莫教雙鬟侍惟恐釵裙咤異人遠出龍

沙已二年幾回搔首向南天不須更作蓬萊想但到中華便是仙後識云予不識

夷文無從翻譯篇中夷語不過就其音而書之字之確否不得而考也元之按蒙

古語奶茶當爲酥台差音差近釵差即茶也台訓有言茶中有酥也呼駝爲忒默默音近摩

肉當爲禡哈佛當爲布爾汗近上聲叩首當爲摩爾郭問好當爲捫都捫音去聲睡爲温

塔温近去聲塔近他字上聲閨女當爲叩肯

寶昌雜錄終

男肇夔同校

勘誤表

寶昌雜錄		蒙園紀聞									
篇別	頁數	行數	勘	誤	頁數	行數	勘	誤			
	一	四	汪誤江		二	廿二	袞誤袞	誤			
	三	五	居庸關過街塔一則應另行		五	十九	或做百姓也好落姓字				
	六	五	己未誤己未		六	五	上巳誤上巳				
	七	十一	一硯歸耕誤一硯耕歸		九	十二	狀衍				
	十	四	晴誤晴		十四	廿一	頌誤須				
	十四	廿一	官誤宮		十五	二	垂誤乘				
	十五	十四	顧誤願		十五	十九	烏誤烏				
	十五	廿四	綫誤賤		廿一	四	伐誤代				
	三	三	披甲誤披軍		五	九	不知何解落知字				
	八	十九	阿拉善落拉字		九	九	牲誤牲				
	十	十	孚誤厚		十	廿一	熟誤熱				
	十一	十六	近誤迫		十二	五	元祐間誤元裕間				
	十三	十九	近誤迫		二十	三	曰誤日				
	廿二	十五	家誤案		廿三	七	過誤遇				
	廿四	九	犬誤大								

